

Uni Neba bíní Saṅ ra Kúnsëe

Di baahi jaṅaa Saṅ fa non apootarri sabboo a ana yi Yéésú rë daa bíní téeríi Uni Nebi bee, ndaa biti daa ri bíní rí wonuy filiḅ. Di fi Saṅ nék, bíníté iñi yéṅké biti Marka a Maccëe a Lúkkë bíníyúy wë, ndaa iña wonu wa ra caakke yi daa wa bok mante (1.19-28 ; Saame Maccëe 3.1-12 ; Marka 1.1-8 ; Lúkkë 3.1-8).

Saṅ wonte biti Yéésú daa Un Koope, te Una a Koope daa mësúu hom. Uni baa daa ac dékké a bëewë, onte bëewë gémú dñi na ra nñi wa henute koyyi Koope (1.1-18). Di wonte biti Yéésú daa bëe' Koope wol ri ëldúnë rë (6.29 ; 17.3).

Filiḅ téeríi beh, Yéésú wonte biti daa ri ñama na ona' pes ḁa (6.35), daa ri nñiñi ëldúnë (8.12), daa ri waala, daa ri Kaaf ka, daa ri na ona' pesa (14.6), daa ri níirëhí kah-kah fa (10.11).

Saṅ wonte sun fi :

- yii lenke iñi éemílé' yë paṅ Yéésú teeḁa'i biti daa ri Koy Koope ra (2.1-11 ; 4.46-54 ; 6.1-21),
- yii lenke tee'a'i Yéésú a Nikodem (3.1-21),
- yii lenke belaa dék Samari ra (4.1-42),
- yii lenke lëfëñidë Betsataa (5.1-18),
- yii lenke bëe' límúu búumíḁ ḁë (9.1-7),
- yii lenke wahtaa nay kolee Yéésú feey fi bee saañ ḁeefri Boffa ra (14.28 ; 16.5-11),
- yii lenke biti bëyí fí faha' yúhí Boffa ñeya' Yéésú në, ay rii yúh rë (14.6 ; 16.26),

- a yii lenke dɗaɗa dɗagid dɗi taalibe yi, dɗéjéenté wɗe Boffi ra (17.1-26).

Bèyí fí jaɗi téerii bee béeb ay ot biti ow mínéh yúh Boffa te ri ñeyeeh Yéesú nē, dɗi fa daa Koy ka ra. Bèyí fí ot Koy ka, otte Boffa.

Bèe' na wonuu Una ra

¹ Dalaana dɗeef Una na ; Una a Koope daa húmú, te dɗi fi Una Koope. ² Una a Koope daa húmú dalaana. ³ Koope ñeya' dɗii na, sakke iña béeb ; lahay yii sakute te ñeyay dɗii na. ⁴ Pesa hom dɗii na, te pesi baa daa niiñi bëewë. ⁵ Niiña na dad ñúusë, ñúusë habay ri.

⁶ Koo húmú wolte bëyí hínú Saɗ*. ⁷ Saɗ acce seedii niiña, nda dɗi mín tah bëewë béeb gém. ⁸ Di a faanaɗ fi, dɗi niiña neh ; seedii niiña daa tah ri koloh. ⁹ Niiñi bah, daa niiñi kah-kah fa yéɗké biti ac èldúnë niiñli bëewë béeb rë.

¹⁰ Una húmú èldúnë. Koo ñeya' dɗii na sakke èldúnë, añaɗ, bëy èldúnë yíih rí. ¹¹ Di ac mboko yi na, ndaa mboko yi síkírúuy rí. ¹² Añaɗ, kaa'eeh lahte bëewí síkírúuté rí, te gémúté rí. Te dɗi onte bëewí yaa béeb ní wa henute koyyi Koope. ¹³ Wa henuuy koyyi Koope di pagad yaal a beleb. Di yii ow daa faha' ri neh bal. Èe-èe' ! Koo daa paɗ ní wa henute koyyi.

¹⁴ Una hente ow, dɗi dékké filiɓ fi yen, ñéerè'té a kaah koceec a malli mínéh dúm, yen na olu. Yen olute ndama liil ri Koo Boffi na ra, ndama yed Boffa Koy ka laha' ri yínë kut dɗa. ¹⁵ Saɗ fa seedeyid dɗi ra, húmú béyífté uni sun won tih :

* **1:6** 1.6 Saɗ fa na wonuu dee ra daa ri Saɗ Batis.

« Bee daa bëe' na húmú wona' mi ron ra bitih : lahte bëyí ee ac filoon so' ra, dí luk soo gaan fap, ndah balaa mi ac, deef dí húmú në. » ¹⁶ Malla kúf dí mínéh dúm dë, dí onte yen na yi caakke ní caak. ¹⁷ Koope ñeya' Mëyíis në pokke Kootaa, ñeyídté mal a kaah Yéésú-Kiristaa na. ¹⁸ Ow ëllëy Koope. Koy ka yínë kut daa ëlíf dí, te dí fi baa Koope. Dí fa hom a Boffa ra daa teeḅa' dee man dí fi Boffa ra.

Woni Saṅ Batis biti dí Kiristaa neh

(Saame Maccëe 3.1-12 ; Marka 1.1-8 ; Lúkkë 3.1-18)

¹⁹⁻²⁰ Saṅ seedeya' Yéésú deh : kélfë yí yëwúdfë homu Yerusalem wolute seeyoh ya a bëy tali Léwí Saṅ na nda meel dí dí fi baa daa ri wa. Meeluu wa ri ra, dí dápáy dara, seedete won tih : « So' mi Buura Koo fal ri ra neh ! » ²¹ Wa meelaatute ri wonu tih : « Kon fu wah ? Fu Éelí ë ? » Dí won wa tih : « Èe-ëe', mi Éelí neh ! » Wa wonaatu ri tih : « Daa fu yonentaa a ? » Dí won wa tih : « Dí so' neh dé' ! » ²² Wa míllúu rí won tih : « Kon daa fu wah ? Won fun bëe' hen fu ra, nda fun lah yii léhínún bëewë wolu fun da. » ²³ Saṅ lofa'te wa a unna húmú won yonente Isayii ra, won wa tih : « Daa mi una húmú dfoh luufa na won bitih : “*Dëddí Yíkëe waala nú júb.*”[☆] »

²⁴ I fariseṅ húmú filib bëewë wolu Saṅ na ra. ²⁵ Wa yabaatute na meelu ri wonu tih : « Fu won ti fu Buura Koo fal ri ra neh, fu Éelí neh te fu yonentaa wadti ac ra neh. Kon yi tah fu na bëtís bëewë ? » ²⁶ Saṅ won wa tih : « Mi hom

☆ **1:23** 1.23 Saame Isayii 40.3

bëtsë' bëewë a muluɓ ; ndaa lahte bëyí ee filiɓ fi bëewë deh, te don yíih rí. ²⁷ Di ee ac filoon so' ra ndaa mi haayayti liil kotti†. »

²⁸ Yii baa laha' énfí laahi Yurdeŋ di Betani‡, tígë nē bëtsë' Saŋ bëewë rë.

Har fa yera' Koope sarah ra

²⁹ Kéy fín fë, Saŋ ot Yéésú na ac dīi na, dī yíppée won tih : « Ēlí ! Bëyí bee daa har fa nay yeree Koope sarah§, hosii bakaadđi bëy ëldúnë rë ! ³⁰ Daa ri bëe' na húmú wona' mi ron ra bitih : lahte bëyí ee ac filoon so' ra, dī luk soo gaan fap, ndah balaa mi ac, deef dī húmú nē. ³¹ So' mi bee sah, mi húmú yéeh bëe' wad dīi hen koon da, ndaa yee kúd aya ac mi, ma na bëtsë' muluɓ ra, dī biti koyyi Israyel yúh rí. »

³² Saŋ wonaat tih : « Mi otte Ruuhi Koope kola'te sun céppé sun fi man bédú nen, hompe dīi na. ³³ Mi húmú yéeh bëe' wad dīi hen koon da, ndaa Koope fa wol so' bëtís a muluɓ ra húmú won so' tih : “Fay ot Ruuha cép hom ow na ; bëyí baa nay bëtsée a Ruuh-Peseŋ.” ³⁴ Te so' mi Saŋ mi otte yii baaha, te mi seedete biti bëyí baa daa Koy Koope. »

Taalibe ya débúu ñee tal Yéésú rë

³⁵ Kéy fín fë, Saŋ ayaatte tígë húmú wë aa' fin ra, caŋke a ow ana di taalibe yi. ³⁶ Ola' ri Yéésú na roommbiil, dī won tih : « Ēlí ! Bëyí

† **1:27** 1.27 mi haayayti liil kotti :Di gerek, bíníyú deŋ : te mi yinte sah pëkísí níh yí ñafadđi. ‡ **1:28** 1.28 Betani :Betani fi bee bokaay a bee dékú Lasaar a Martaa a Mari ra. § **1:29** 1.29 har :Di gerek, bíníyú deŋ : koy har.

bee daa har fa nay yeree Koope sarah ra ! »
³⁷ Keluu taalibe yi ana ya unni yah, wa ñeyute tal Yéésú. ³⁸ Heelta' Yéésú otte biti wa ñeyu tali ra, dī meelte wa won tih : « Don saamu yih ? » Wa dëekúuté rí a tii bëyí nē yëeddë' Unni Koope, wonu ri tih : « Rabbi, fu dék dih ? » ³⁹ Di won wa tih : « Èyí don ot. » Tígí daaha, bi deef na'a konte, wani Yéésú ñéerúuté, wa yúhúté tígè dék dí rë, wa yeelutee dīidë' caan fi bisa a dī.

⁴⁰ Anndere koy-yaafi Simoṅ Peer, non bëewí ana ya keluu wa unni Saṅ, wa ñeyute tal Yéésú rë. ⁴¹ Di déḅpí pay saami Simoṅ, won dī tih : « Fun olute Méssiífë ! » (Iti fi tii baa daa ri Kiristaa mbée Buura Koo fal ri ra.) ⁴² Anndere kúdté Simoṅ Yéésú nē. Yéésú yeelte Simoṅ ní won dī tih : « Daa fu Simoṅ, koy Saṅ ; dala'te woteh, fay dëekúu Sefaas. » (Iti fi tii baa daa ri : Peer. Iti fi tii Peer daa : la').

Fílíp a Natanayel

⁴³ Kéy fín fë, Yéésú hampe waali Galile. Laha' ri ra, dī tee'a'te a Fílíp, won dī tih : « Aye fu ñee tal so' ! » ⁴⁴ Fílíp dék Betsaydaa, bani Anndere a Peer daa boku gin. ⁴⁵ Di fi Fílíp nampee pay otte Natanayel, won dī tih : « Fun olute bëe' nē wona' Mëyíis téeríi Kootaa ra, bee na wonuu yonente ya Téerëe rë : yaa Yéésú fi Suseef, bee dék Nasaret ra. » ⁴⁶ Natanayel won dī tih : « Yin wun mín dúh Nasaret nagajek a ? » Fílíp won dī tih : « Yen saañ fu tíkícf afu íl ! » ⁴⁷ Wa beyute waala na suu. Ola' Yéésú Natanayel na ac dīi na, dī won dī tih : « Bee daa koy ki Ísrayel tígí-tígí, bi yéeh nofa' ow ! » ⁴⁸ Natanayel won dī tih : «

Fu yúhë' sè' dih ? » Yéésú loffe ri won tih : « Homa' fu tal eena deef Fílíp dëekëy rë doom ra, mi otte ro. » ⁴⁹ Natanayel béyídté uni won tih : « Bahaa, kon daa fu Koy Koope ! Daa fu Buuri Israyel ! » ⁵⁰ Yéésú won dī tih : « Wona won mi ro biti mi otte ro tal eena ra, daa tah fu gém ë ? Fay ot yi luk baa éémílë'. » ⁵¹ Di antee baat won tih : « Mee ron won kaaf ka ra ee : don ay ot sun-Koo kúnsëh, malaaka yi Koope lawe sun cépé, aye so' mi Koy-bëe' në. »

2

Kílëegë lah Kanaa ra

¹ Waal ana filoon fi baaha, kílëek lahte Kanaa di Galile. Yaafi Yéésú húmú në. ² Yéésú a taalibe yi bal dëekuté kílëegë, wa ayute. ³ Dúmë' béëñë ndaje ma ra, yaafa nduṅutte Yéésú baaha won dī tih : « Wa lahluy béëñ. » ⁴ Yéésú won dī tih : « Síkirëh sè' yaa ow ! Fu faha' biti mi paga yi te wahtii so' lahay doom ? » ⁵ Yaafa payte won koy-pagoh ya tih : « Yii won don dī béëb, lah pëgí rí. » ⁶ Deef lahte yaad pëenë yí yugusuu la' húmú në, yi yëwúdfë yahti bukutoh raa efuu na. Bina-bina waa na béëb wadtee mín sod binwaar iniil mbée pëenë. ⁷ Yéésú won koy-pagoh ya tih : « Néhi yaadfi yee muluḅ. » Wa nehute yaadfa ní líiffé pew. ⁸ Tígí daaha, Yéésú won wa tih : « Leegi éfi në mulaa don kom koy ki gaana. » Wa pagute yii baaha. ⁹ Díkísë' koy ki gaana efa, deef mulaa yíssëhté béëñ. Di yéeh tígë koluu koy-pagoh ya béëñë rë, ndaa wa fi yaa yúhú. Tígí daaha, koy ki gaana dëekké yíkíi kílëegë

¹⁰ won dī tih : « Ndaje mi lah béeb bëewë débúu efa' béeeñe lukki neβ da. Tíl nū bëewë sampi píi faanni wa raa nék, yee loolay níi rë anti dúhrú ! Do nék fu henay dah, fu yef béeeñe lukki neβ da yefo níi a deh. »

¹¹ Baa daa kimtaana débpi paŋ Yéesú rë. Di paga' ri Kanaa di Galile. Daaha, dī teeβa'te ndami, tahte taalibe yi gémuté rí.

¹² Filoon fi baaha, dī saañce Kafarnawum bani yaafi, koy-yaayyi a taalibe yi ; wa homute i waal daaha.

*Yéesú a yaayoh ya filiβ Faam fi gaani Koope
(Saame Maccë 21.12-13 ; Marka 11.15-17 ;
Lúkkë 19.45-46)*

¹³ Leβa' Paagiyëwúddë rë, Yéesú kolohte saañce Yerusalem. ¹⁴ Laha' ri dī haalte baylii Faam fi gaani Koope ra, dī deef júlë yë wani harra a fañji wa filiβ, yaayoh yi bédú yë, a bëewë në lofrantuu hélíis rë. ¹⁵ Tígí daaha, dī saampe dúf níh yugusse njooraa, líkké wë, dúhídté wë béeb ëssín bani júrí wë ; dī júlkeñcé taabulli bëewë në lofrantuu hélíis rë, hasalte hélsí wë feey, ¹⁶ antee won yaayoh yi bédú yë tih : « Këllí iñyee béeb deh ! Ngënë tíkí faam Baaso' yaayaa ! » ¹⁷ Filoon fi baaha, nuffi taalibe yi payte unna bíníyú Téerëe rë bitih : « *Tígë teem so' Faamu ra, daa mi yúh rí keeñ so' !* »[☆]

¹⁸ Tígí daaha, baha yi yëwúddë wonu ri tih : « Pagid fun yii éemílé'í nay fun teeβe biti fu lahte sañ-saña paga' fu yii bee ra ! » ¹⁹ Yéesú tahte won wa tih : « Don poysa' Faam fi gaani Koope

☆ **2:17** 2.17 Saame Kaña a ya 69.10

fi bee raa, may rii tabahaat filiḅ waal éeyë. »
²⁰ Baha yi yëwúdfë wonu ri tih : « Faam fi bee tabahute kíil sabay iniil a kíil pëenë (46) bee ra, ðo fantee won fu mín ðíi tabahaat filiḅ waal éeyë ë ! »
²¹ Ndaa Faam fa na wona' Yéésú rë, ði yin kay neh gét nëe wona' faan ði fi baaha. ²² Tílé' ní Yéésú këllúté búudé rë, taalibe ya nérsúté biti Yéésú na húmú won uni bah ; yii baa tahte wa gémúté yee won Téerëe rë a una húmú won Yéésú rë.

Yii homa' ow béeb Yéésú yúh rí

²³ Jamanaa homa' Yéésú Yerusalem feedi Paaga ra, ow caak gémúté rí oluu wa kimtaanna paḅ ði ra. ²⁴ Ndaa bi yúh Yéésú bëewë béeb, ði lekaay wa. ²⁵ Di húmú sohlaay biti ow ac ðii na won biti díw man ðeh, ndah yii homa' ow béeb ði yúh rí.

3

Yéésú a Nikodem

¹ Lahte bëyí hínú Nikodem, ði non farisenḡa te ri kélfë yëwúdf. ² Di acce elek deefidte Yéésú won ði tih : « Bahaa, fun yúhúté biti Koope daa wol ro yëeddi fun, ndah ow mínéh paḅ kimtaanna paḅ fu ra hém Koope ñéerëey a ri. »
³ Yéésú tahte won ði tih : « Mee roo won kaaf ka ra ee : ow mínéh yúh iña Nguur ki Koope, hém ði límëetúy. »
⁴ Nikodem meelte ri won tih : « Ow tíl ní baha raa, ði ay límëetúu díh ? Di ii nimil loo yaafi límëetú kay maan ? »
⁵ Yéésú tahte won ði tih : « Mee roo won kaaf ka ra ee : ow mínéh haal

Nguur ki Koope, hém dī ñeyay muluḥ a Ruuh-Pesen, dī límēetú. ⁶ Bëyí límú ow, pesa' pes ow ; bëyí límú Ruuhi Koope, pesa' Ruuhi Koope. ⁷ Yin ñanay roo jaahal di yee wona' mi ro biti bëewë warutee límēetú rë. ⁸ Ngilaaw ma laḥa' tígí neba' ri fu kelee na neh a ? Añcaṅ, fu yéeh tígë kola' ri a tígë na saañ dī ra ! Di ḍaaha kep di bëyí límú Ruuhi Koope ! » ⁹ Nikodem won dī tígí daaha tih : « Baa mínë' lah dīh ? » ¹⁰ Yéesú won dī tih : « Yëeddëhë teempe ti ḍo nen Israyel fu yéeh yii baa a ? ¹¹ Mee ron won kaaf ka ra ee : fun hom wonuu iña yúhú fun ḍa, fun seede iña na olu fun ḍa, ndaa ḍon fahuuy fun síkirëh. ¹² Mi won ḍon iñi ëldúnë ḍon gémúy së' rëe, ḍon ay soo gémée dīh biti mi wona ron iñi sun-Koo ? ¹³ Ow pëyrëy yúhí sun-Koo ; so' mi Koy-bëe' fë kola' na ra doṅ daa yúh rí.

¹⁴ « Dee kera' Mëyíis goṅ fa yugusuu përem sun fi duuda, béyídté rí luufa ra[☆], so' mi Koy-bëe' mi waḍti bëyrúun ḍaaha, ¹⁵ nda bëyí gém së' bëeb lah pesa na ḍúméh rë. ¹⁶ Yúhí biti Koope faha' bëewë fahoo níi dī yera'te Koy ka laha' ri ra kut, nda bëyí gém dīi na bëeb banti sanṅu, lah pesa na ḍúméh rë. ¹⁷ Koope wolay Koohi ëldúnë biti ri ac daani bëewë ; ëe-ëe', dī wol ri sëmlë'í wë. ¹⁸ Kon bëyí gém Koy ka na ii daanu ; bëyí gëmëy rí nék daanute níi wocce, af yee gëmëy bëe' dī fi Koy ki yínii Koope kut ra. ¹⁹ Te yee haala' daana ra daa ri beh : niiña acce feey, ndaa ñúusë daa génël bëewë niiña ndah pagadḍi bossi wa. ²⁰ Bëyí na paṅ bos bëeb

☆ **3:14** 3.14 Saame Kíni ñey Israyel 21.9

wonay yin niiña, dī hega' ri hegoo, ndah dī kaa' bitī pagad'dī bossi feeñ. ²¹ Bëyí paga' kaah nék saama' niiña, nda bëyí ot pagad'dī béeb yúh bitī Koope daa bek dī na. »

Yéésú a Saṅ Batis

²² Filoon fi baaha, Yéésú a taalibe yi koluute suute Yúdéé. Di hompe i waal daaha a wa, dī na bētís bëewë. ²³ Saṅ nampee hom Enon di hëbís Salim na bētís daaha bal, bi caak tígë muluḅ. Bëewë aye dī na, dī bëtsé wë. ²⁴ Baaha deef dī téyúy kasu doom.

²⁵ Lahte bis, i ow di taalibe yi Saṅ na taasuu a yëwúf yii lenke di na bukutuu. ²⁶ Wa payute Saṅ na wonu ri tih : « Bahaa, fu nérsëhté bëe' doni húmú énfí laahi Yurdeṅ fu na seedeyid dī ra a ? Di dalte bētís te bëewë béeb yuluu dī na. » ²⁷ Saṅ won wa tih : « Ow mínéh lah yii man dah, te Koo oneh ri ri. ²⁸ Don mínú seede bitī sah, mi wonte bitī mi Buura Koo fal ri ra neh, a bitī Koope wol so' këllëhí doṅ. ²⁹ Kílëek bi yaali ; kooji yaala nék homa' dah, kelee una, keeña sos níi sos. Daa mi kooji bah, yii baa daa tah keeñ so' sos níi sos. ³⁰ Di waḍti laha maakaama laho saye, bi so' ëylée.

³¹ « Bëe' kola' sun-Koo ra daa paa' béeb sun. Bëyí feey fi beh, míntí nona feey te wona' yii len ëldúníi beh. Bëe' kola' sun-Koo ra nék [daa paa' béeb sun] ; ³² dī seedeya' iña ot dī a yee keloh ri ra, ndaa ow na síkíreeh rí. ³³ Bëyí tah iña na won dī ra, déggëlté bitī Koo wona' kaah. ³⁴ Bëe' Koope wol ri ra, léhínë' woni Koope, ndah Koope beb Ruuhi Pesenji béeb sodte ri ri. ³⁵ Boffa daa

faha' Koy ka níí tíkké iña béeß ya'i. ³⁶ Bëyí gém Koy ka lahte pesa na dúméh rë ; bëyí kaa' gémí rëe nék ii yúh pesi bah, te Koope ay rii dékéé teeß haay-keñ. »

4

Yéésú a belaa dék Samari ra

¹⁻² Waalli yaaha, farisenja keluute ban fi biti yee lah Yéésú taalibe, bëtíssé wë rë, luk yi Sarj Batis. (Deef nagajek dí fi Yéésú neh daa na hómú bëtís, taalibe yi daa na hómú pagu yaa tígë.) Yúhë' Yéésú biti yii baa halte nuffi farisenja ra nék, ³ dí kolohte Yúdée, na nimil Galile. ⁴ Di yahti saañ dín fë rëe, dí wadtee ñee Samari. ⁵ Daaha, dí tilté níí dí lebohte gini hínú Sikaar non Samari, di hëbís feey fa hómú on Yakop koohi Suseef ra. ⁶ Yakop hómú hacce yéem daaha. Bi mok Yéésú waali, dí tookke búk yéemë na hílsëh, ðeef na' lahte leelu af. ⁷⁻⁸ Taalibe yi suute filiß ginin saam yii nay waa ñame.

Lahte belii dék Samari acce neh wahtii baaha. Yéésú won dí tih : « On so' muluß mi han yaa ow. » ⁹ Belaa won dí tih : « Mantee bal, fu daga' so' muluß díh te fu yëwúð, mi bëy Samari ? » (Deef wa fi yëwúððë nagajek, fahuuy bok a bëy Samari dara.) ¹⁰ Yéésú won dí tih : « Fu yúh yii na ona' Koo a so' mi bëe' na won a ðo ra koon, daa fay soo dage muluß, mi on ðo mulaa na ona' pes ða. » ¹¹ Belaa tahte won dí tih : « Bahaa, ðo fu lahay hoc níí wocce, te yéemë noodte tíkké sun ! Fay dúhée mulaa na ona' pes ða di kon ? ¹² Ciffi fun Yakop daa helið fun yéemí beh. Di hante na mulaa, koyyi hanute na, yuppi hanute

na, fantee haba' biti fu luk dñi gaan a ? » ¹³ Yéésú won dñi tih : « Bëyí han na mulii yéemí bee bééβ, fay sifiraat ; ¹⁴ ndaa bëyí han na mulaa nay mi rii one ra, ii sifiriil ta' : mulaa nay mi rii one ra kay, ay yíssée culi julli pesi na dñuméh dñi na. » ¹⁵ Belaa won dñi tih : « Bahaa, on so' na mulii yah, nda mi woc sifiroh te mi aylileh neh yéemí beh. »

¹⁶ Yéésú won dñi tih : « Kon paye fu kale yaalu fu ac. » ¹⁷ Belaa won dñi tih : « Mi lahay yaal. » Yéésú won dñi daaha tih : « Fu won kaah biti fu lahay yaal, ¹⁸ ndah fu ñeete yaal iip, te bëe' doni na pesu leegi ra yaalu neh. Kon fu won kaah ! »

¹⁹ Tígí daaha, belaa won dñi tih : « Bahaa mi ot na, fu yonente ! ²⁰ Caacci fun húmú jaamiyuu Koope sun fi dañi beh, ndaa don fi yëwúdfë, don wonu dñi wañti jaamiyuun Yerusalem. » ²¹ Yéésú won dñi tih : « Yaa ow, géme yee na won mi ro bee ra : ay tíl ní jaamiyohi bëewë Baap-Koo sun fi dañi beh, mbée Yerusalem ii caak solo. ²² Don fi bëy Samari, don na jaamiyuu, ndaa don yíh Koope ; fun fi yëwúdfë nék, fun na jaamiyuu ri te fun yúhú rí, ndah ri ñeya' fun fi yëwúdfë në, múclí èldúnë. ²³ Wahtaa hompe lah, te ri lahte, wahtaa nay jaamiyee bëewë na saamu Baap-Koo kah-kah ra, wa ñeya' ri Ruuh-Peseñ a kaaf ka ra. Baap-Koo saam mani bëewí yah. ²⁴ Koope dñi Ruuh, te bëyí na jaamiyoh ri wañti ñeyaa Ruuhi a kaah. » ²⁵ Belaa won dñi tih : « Mi yúhté biti Buura Koo fal ri ra maanam Kiristaa, ac ayo. Di ac daa, dñi ay fun teeβ bééβ. » ²⁶ Yéésú won dñi tih : « Daa mi, so' fa na won doo na ra. »

²⁷ Taalibe yi Yéésú lahuu tígí daaha. Oluu wa Yéésú na won a beleb ra, wa éémúté níi éém, ndaa ow di waa na kaañay meel Yéésú yee na saam dī ra, a yee tah dī na won a belaa ra. ²⁸ Tígí daaha, belaa helte peni mulii, nimilte ginin won bēewē tih : ²⁹ « Ēyí don ot bēe' abee wonte so' iña paṅ mi ra bēeb. Di Buura Koo fal ri ra neh delem a ? » ³⁰ Bēewē koluute, suute dēefri Yéésú.

³¹ Filiḅ fi baaha, taalibe ya gangalu Yéésú ñam wonu tih : « Bahaa, túmé yin lowu book ! » ³² Ndaa dī won wa tih : « Mi lahte ñami don yíih rí. » ³³ Tígí daaha, wa na meelantuu hanndal ki wa wonu tih : « Ow kompe ri ñam neh a ? » ³⁴ Yéésú won wa tih : « Paṅ yee faha' bēe' wol so' ra níi mit sēk, daa ñami so'.

³⁵ « Don wonu neh dee a lec tas céyín iniil a ? So' mi won don tee : ělí meeyya ! Iña nonte níi seh lec. ³⁶ Bēe' nē lec ḁa ee liil yínlí rē, na négírē' peba na saañ pesa na ḁúméh rē. Hen ḁaaha raa, bēe' soh ra a bee lec ḁa bok, lah sos-keeñ. ³⁷ Léehē won kaah bitih : “Bēe' soh ra bokaay a bee lec ḁa.” ³⁸ Mi yeñce ron lec meeyi don mēsúy nēe paṅ dara. I ow kay daa légéyú rí, don daa njiriñuu ri. »

³⁹ Kola'te bee wona' wa belaa biti Yéésú wonte ri iña paṅ ri bēeb rē, i ow caak di bēy Samari dékú gini baa ra gémúté Yéésú. ⁴⁰ Te dēefruu wa ri ra, wa ḁagute ri dī hom waa na daaha ; tígí daaha, dī hompe waal ana waa na. ⁴¹ Iña na won dī ra tahte wa baatuutee caak na haalu ngémē. ⁴² Wa wonu belaa tih : « Iña bílíd fu fun ḁa daa tah fun gém neh don, ndaa biti fun

kellirute affi fun dī na won, te fun yúhúté biti daa ri Sēmlēhí ēldúnē kaah. »

Koy daga pay Yéésú rē

⁴³ Filoon fi waalli ana ya hom Yéésú daaha ra, dī kolohte saañce Galile. ⁴⁴ Di wonidte afi bitih : « Yonente heefuu gina dék dī rē. » ⁴⁵ Laha' ri Galile ra, bëy gina teeriyuute ri daaha, ndah payuu wa feedi Paaga Yerusalem ra, wa olute iña paṅ dī filiḅ feeda ra bëéḅ.

⁴⁶ Daaha, Yéésú ñeyaatte Kanaa di Galile, tígē húmú yissè' rí mulaa bëéñ rē. Deef ow di dakki buur dék Kafarnawum, koy ka keente jér. ⁴⁷ Kela' ri biti Yéésú kolohte Yúdée acce Galile ra, dī saañce deefidte ri, danke ri pay Kafarnawum payid dī koy kee ke ri na maannda' húl rē. ⁴⁸ Yéésú won dī tih : « Don oluy kimtaan a iña éemilè'té rēe daal, won ti don ii gém múk è ! » ⁴⁹ Daga won dī tih : « Bahaa, yípée ac faam balaa koy so' húl. » ⁵⁰ Yéésú won dī tih : « Nimile faam, koohu béyídté af, yin ii rii kat. » Bëe' gémpé yee won dī Yéésú rē, kolohte na saañ faam. ⁵¹ Di hom waali faam fa, súrgē yí téebilúuté rí wonu ri tih : « Bahaa, koohu kolohte ! » ⁵² Di meelte wa wahtaa koloh kúkëyë rē, wa wonute ri biti faan kúkëyë woc tama bee wota' na' yutuud leelu af aa' fin ra. ⁵³ Boffi kúkëyë yíppée ot biti yaa wahtaa wona' ri Yéésú biti koohi béyídté af ra. Kola'te baaha, bani bëy faami bëéḅ gémúté Yéésú. ⁵⁴ Baa daa kimtaani ana fa paṅ Yéésú kola' ri Yúdée nimilte Galile ra.

5

Lëfëñíðë pay Yéésú rë

¹ Filoon fi baaha, ndaje di ndaje yi yëwúdfë lahte Yerusalem, Yéésú kolohte saañce na. ² Gini baaha lahte laahi Ébrë yë wonuu ri Betsataa, hom hëbís ílë në wonuu Ílí Harra* ra. Di lahte mbaar iip. ³ I jéríð caak daa fanuu mbaarri yaaha : búumídfë deh, bëewë në yííbú rë deh, lëfëñíðfë deh. [⁴ †] ⁵ Filiß fi jéríðdí yaaha, lahte na bëyí hente kiil sabay éeyë a kiil peeye (38) dī fanohte ri jér. ⁶ Ola' Yéésú bëe' fanohte feey te ri yúhté biti dī maañcee jér rë, dī meelte ri won tih : « Fu faha'te biti fu wah a yaal kowa ? » ⁷ Jérðë won dī tih : « Bahaa, mulaa hégíyëh rëe, mi na laheh bëyí mín sëe bek filiß laaha ; mi home étíð saañ haal raa, ow kay dëb së' filiß. » ⁸ Tígí daaha, Yéésú won dī tih : « Kolee, fu pon dilu fu tíl. » ⁹ Bëe' yíppée wah, kolohte ponte dili na tíl.

Yiin pay Yéésú bëe' rë tee'a' a bisa na hílsúu yëwúdfë rë. ¹⁰ Oluu baha yi yëwúdfë bëe' a dili, wa wonu ri tih : « Fu waray meeb dilu bisee woteh beh, dī bisa na hílsúu rë ! » ¹¹ Bëe' won wa tih : « Bëe' pay so' ra daa won so' mi beb dili so' mi tíl. » ¹² Wa meelute ri wonu tih : « Bëe' won dō baaha ra wah ? » ¹³ Ndaa bëe' yéeh

* **5:2** 5.2 Gini Yerusalem béeb húmú mírú mírë ní embite, dī antee lah íl caak. Ílí bee na wonuu Ílí Harra bee ra, bëewë habuu biti harra húmú ñéyrúu në biti wa húmú yahti haal gina.
 † **5:4** 5.4 Bëewë húmú ñeyaatu unni yee bín fë wora'i wa bëewë rë, lahte na yi húmú bíníyú yii beh : Wa homu daaha sehe hégíyëhí mulaa. Na hom ní lah wahtii malaakii Koo-Yíkëe ac hégíy mulaa, te jérðë në dëbpi haal mulaa wahtii baaha ra ay wah, a di míntí man jérë béeb.

payohi, dī mínéh ríi teeḅa', bi múuy Yéésú filib dúukēlí ḅēewē húmú daaha ra.

¹⁴ Filoon fe, Yéésú tee'a'te a ḅēe' filib Faam fi gaani Koope, won dī tih : « Fu abaa fu wahte leegi ! Ngana bakaaril, toñeh yii luk baa misik ay roo kate. » ¹⁵ Kola' ḅēe' dah, dī payte wonte ḅaha yi yēwúḁḁē bití ḅēe' pay dī ra Yéésú. ¹⁶ Kola'te baaha, wa henute halañ sun fi Yéésú, di yee paya' ri ow bisa na hílsúu wē rē. ¹⁷ Ndaa Yéésú won wa tih : « Baaso' ee légéy rē na saañ, so' ḅal mee légéy rē maa saañ. » ¹⁸ Wona won dī baa ra, tahte ḅaha yi yēwúḁḁē ḅaatuutee caṅ hawi húl, ndah teyay bití donṅ dī poote kootii bisa na hílsúu rē, ndaa dī wona' ti Koope daa boffi, daa ri bití daa wa teyu.

Sañ-sañi Koy ka

¹⁹ Yéésú tahaatte won tih : « Mee ron won kaaf ka ra ee : so' mi Koy ka mi mínéh koloh rek mi paṅ ; mi paga' yee ot mi Baaso' na ra. Yii paṅ Baaso' ḅééḅ, so' mi Koy ka mi paga' ri. ²⁰ Di faha'te so', te dī na teeḅ so' iña na paṅ dī ra ḅééḅ. Di ay soo teeḅ yi ay pagu kay, yi luk yaa gaan fap níi ḁon éem : ²¹ di na kēllē' Baaso' ow búudé on dī pes, so' mi Koy ka ḅēyí neḅ so' mi on dī pes. ²² Baaso' na aattiyeeh ow, ndaa dī onte so' mi Koy ka sañ-sañi aattiyaa mi ḅééḅ, ²³ nda ḅēewē ḅééḅ yed so' mi Koy ka cér ti di yeruu wa ri Baaso' nen. ḅēyí yeray so' mi Koy ka cér, ḁeef yeray Baaso' fa wol so' ra cér. ²⁴ Mee ron won kaaf ka ra ee : ḅēyí síkírēh woni so', te ri gém ḅēe' wol so' ra, lahte pesa na ḁúméh rē. Di ii daanu : dī múccé kúl kē, haalte pesa. ²⁵ Kaaf

ka bee búk sē' beh : wahtaa ee saañ lahe ra, te ri lahte nīi wocce, wahtaa nay kelee bēewē húlú rē un so' mi Koy Koope ra, te bēewē nay kelee woni so' ra ay pes. ²⁶ Di homa' pesa Baaso' na, dī tahra' so' ri dāaha, pesa hompe soo na. ²⁷ Te ri onte so' mi Koy ka sañ-sañ aattiyaa, ndah daa mi Koy-bēe'. ²⁸ Yee won mi dōn ra banay ron jaahal : wahtaa ee ac da, bēewē húlú hacu feey fi bee ra bēeb ay keloh un so', ²⁹ te wa ay koloh búudé. Bēewē hómú paguu yin wun ra ay koloh, haal pesa na dúméh rē, yee hómú paguu yin bos ra koloh, daanu. ³⁰ So' mi Koy ka mi mínéh koloh rek mi paŋ, mi na pageh yee neba' so' ra, ndaa yee neba' bēe' wol so' ra. Mi hom aattiya' yee nah so' Koope ra, te aattiya'i so' júbpe.

Seede yi Koy ka

³¹ « Daa mi seedeyira af so' iñi so' koon kep, ow ii tah biti mi won kaah. ³² Ndaa ow kay daa na seedeyid so', te mi yúhté biti iña na won dī sun fi so' ra kaah. ³³ Don wolute i ow Saŋ Batis na, te iña won dī sun fi so' ra kaah. ³⁴ Seedii leŋ sun fi so' yaha bi ow kut, mi sohlaay ; ndaa mi won dōn woni Saŋ, nda dōn mín múc. ³⁵ Saŋ hómú man lampii kēdfú hawaanaa nen, te dōn hómú dalute ot neb nīiñi. ³⁶ Ndaa lahte seedii daa luk bi Saŋ lah solo : daa wa iña na paŋ mi ra. Yee nah so' Baaso' paŋ ra won sun fi so', wa teeba' biti Baaso' daa wol so'. ³⁷ Te Baaso' fa wol so' ra, seedeyid so' bal. Yaa biti kay, dōn kélúy dī na won, te dōn élúy rí. ³⁸ Don habuy unni dōn na ndah dōn gémúy so' mi bēe' dī wol ri ra. ³⁹ Don yahti yoon Téerēe rēe, dōn bekuu keeññon bēeb

filiḅ, ndah ḁon séentúu pesa na ḁúméh rē nē. Añcaŋ, Téerēe seedeyid so', ⁴⁰ ḁon anutee kaa' ḁeefri so', ḁon pes !

⁴¹ « Mi sohlaay kañi kola' ow na. ⁴² Mi yúh ḁon : mi yúhté biti ḁon fahuuy Koope. ⁴³ Mi ayid Baaso', ḁon kaa'uute síkírēhí sē'. Ndaa ow kay daa ayira aŋi raa, ḁon síkírēh rí. ⁴⁴ Don fahuu biti rek ḁon kañantee affon, ḁon anutee fahuuy kañi kola' Koope fa yínē kut ḁa ! Don ay soo gémée ḁíh ? ⁴⁵ Ngēnē hēbúu biti daa mi nay ron teebee a Baaso' ; Mēyíis daa nay ron teebee, ḁi fa ḁon tíkú yaakaaron ḁii na ra. ⁴⁶ Nagajek, ḁon gém Mēyíis kaah koon, ḁon warutee soo gém, ndah ḁi bínité yii leŋ soo na. ⁴⁷ Ndaa hém ḁon gémúy iña bíní rí rēe, ḁon ay gémée wonni so' ḁíh ? »

6

*Mbúurú yí iŋpa a jénní ana ya
(Saame Maccēe 14.13-21 ; Marka 6.30-44 ;
Lúkkē 9.10-17)*

¹ Filoon fi baaha, Yéésú húussé laahi Galile fa na wonuu bal laahi Tiberiyat ra, saañce búgí yínēe. ² Bi olu bēewē kimtaanna na paŋ ḁi, ḁi na wahil jéríḁḁē rē, dúukēl ow ñeete tala. ³ Laha' ri ra, ḁi lappe ḁaŋ, tookke a taalibe yi. ⁴ Baaha, ḁeef feedi yēwúḁḁē na wonuu Paak ra lebohte. ⁵ Béyrē' Yéésú aŋi, ḁi otte bēewí caakute níi caak na ayu ḁii na. Tígí daaha, ḁi meelte Fílíp won tih : « Yen ay lomee mbúuríi mín ñēmíḁ bēewí yee dih ? » ⁶ Di hom olsohi Fílíp, daa tah ḁi wona' ri ḁah ; ḁeef ḁi yúhté yee nay ri page ra níi wocce. ⁷ Fílíp won ḁi tih : « Wuti yen lah hélsí tam

dúmléh wë koon*, ii mín lom mbúurú ní wa béeb lah wuti yaha ñiip. »

⁸ Tígí daaha, ow kay di taalibe yi, Anndere koy-yaafi Simoŋ Peer won dī tih : ⁹ « Lahte kúkēyí kúdté mbúurú loorso† iip a jén ana deh, ndaa wa ay taabe bëewí caakki yee yih ? » ¹⁰ Yéésú won wa tih : « Wēní wë took. » Deef tígē hómú caakke gaawa. Wonuu wa baaha ra, wa tookute. Bëewí yaalla hómú nè rē warutee mit ow júnní iip (5.000).

¹¹ Yéésú bebpe mbúurēe, símpé Koope, wora'te wa bëewē. Di bebpe jénē hente daaha bal, wora'te wa bëewē ní ow fi ow waa na béeb lahte yi doyte ri. ¹² Ñamuu wa béeb ní wa laalute ra, Yéésú won taalibe yi tih : « Négíríi wooñjiida, yin ban naa yah. » ¹³ Négírúu wooñjiidi mbúurú yí iippa ñamu bëewē rē, wa líiffé dama sabboo a dama ana. ¹⁴ Ola olu bëewē kimtaana paŋ Yéésú rē, tahte wa wonu tih : « Bëyí bee daa yonentaa hómú wonu biti wadtee ac ëldúnē rē kaah ! » ¹⁵ Bi yúh Yéésú biti bëewē yuluu hami daaha tík dī buuri wa, dī héciilté lappe daŋa, bani aŋi njunduŋ.

Tíli Yéésú sun fi mulaa

(Saame Maccëe 14.22-33 ; Marka 6.45-52)

¹⁶ Sos na'in, taalibe yi Yéésú cépúté búk laaha. ¹⁷ Wa haalute gaal na húusú laaha yullute waal Kafarnawum. Koo elekke affi wa, deef Yéésú

* **6:7** 6.7 hélsí tam dúmléh wë :Di gerek, bíníyú d'eh : dēñé tíméer ana (200). Dēñé yínē, daa ganjarma yíníl légéy sùrgē bis múlgús. † **6:9** 6.9 loorso :Wa peppi man pep bele nen. Wa hom yugusuu mbúurú.

deefray wa doom. ¹⁸ Bi gaan ngilaaw ma, mulii laaha yampe na hégíyëh. ¹⁹ Sayuu taalibe ya níi wa homute yii mitte kilomet iip mbée pëenë filib laaha ra, wa séenuté ow na tíl sun fi mulaa, deef Yéésú daa na ac waa na gaala ; wa yípútée tíit. ²⁰ Ndaa Yéésú won wa tih : « Ngënë tíití ! Yaa so' ! » ²¹ Tígí daaha, taalibe ya homu woni dī haal gaala, wa yípútée teer tígë na suu wa koon da.

Ñama na ona' pes da

²² Yíilë' Koo káy fín fë, dúukëlí bëewë húmú tasu búk laaha ra húmú olute biti gaal yínë kut daa húmú daaha aa' fin ; te wa yúhúté biti na suu taalibe ya ra, Yéésú ñeerëey a wa filib gaala ; wani affi wa kut daa suu. ²³ Tígí daaha, lahte gaalli koluu Tiberiyat ayute teerute hëbis tígë húmú ñamuu wa mbúurëe, bee símé' Yíkëe Koope ra. ²⁴ Bi olu wa biti dī fi Yéésú a taalibe yi húmúy në, wa haalute gaalli yaaha, na suu Kafarnawum saami.

²⁵ Deefuu wa ri búgí yíníi laaha ra, wa meelute ri wonu tih : « Fu ac dee kiri bahaa ? » ²⁶ Di won wa tih : « Mee ron won kaaf ka ra ee : wëerté sè' biti mbúurëe ñamu don níi looyon mayce ra daa tah don na saamu so', ndaa biti don yúhú iti fi kimtaanni so' neh. ²⁷ Ngënë mēkí ñami ay millée yah. Lah mēkí bee na ona' pesa na d'úméh rē kay, bee nay mii onee so' mi Koy-ñëe' rē. Baap-Koo yedte so' sañ-sañi baaha. » ²⁸ Wa meelute ri wonu tih : « Koope faha' biti fun pañ légéyí bih ? » ²⁹ Di won wa tih : « Légéyë seh Koope don na ra biti don gém so' mi bëe' dī wol ri ra. » ³⁰ Wa wonu ri tih : « Fay fun teebe kimtaani bi níi tah

fun gém dë ? Fay page yii bih ? ³¹ Caacci yen ñamute maan‡ luufa ti di bíníyúu rí Téerëe bitih : *“Di onte wa yii ñamun wa, yii kola' sun-Koo.”*✧
 » ³² Yéésú won wa tih : « Mee ron won kaaf ka ra ee : Méyiis neh daa ona' ñama kola' sun-Koo ra, Baaso' daa na on d'on ñami kah-kah fa kola' sun-Koo ra. ³³ Ñama na ona' Koope ra, daa ri bee kola' sun te na on bëewë pesa na d'úméh rë. »
 » ³⁴ Tígí daaha, wa wonu Yéésú tih : « Bahaa on fun ñami yaa faraaah. » ³⁵ Di won wa tih : « Daa mi ñama na ona' pesa ra. Bëyí d'eedí so' wocce yaaß, bëyí gém sè' wocce sifiroh. ³⁶ Mi wonte ron ri : d'on olute so' ngëey, ndaa d'on kaa'uute gémí sè'. ³⁷ Bëyí Baaso' on so' ri béeb ay soo d'eedí, te bëyí d'eedí so' mii rii lík, ³⁸ ndah mi cépëy feey fa pañi yee faha' mi ra, ndaa pañi yee faha' bëe' wol so' ra. ³⁹ Yee faha' bëe' wol so' ra nék daa ri beh : mi banti ñak ow yínë di yee déjéen dí so' ra, ndaa mi waf waa këllë këllë búudé yiin nay túkkíyé öldúnë rë. ⁴⁰ Yee faha' Baaso' ra daa ri bitih : bëyí yeel so' mi Koy ka béeb te ri gém sè', dí liil pesa na d'úméh rë, mi këlíf dí búudé yiin nay túkkíyé öldúnë rë. »

⁴¹ Wona won Yéésú biti daa ri ñama kola' sun ña, tahte yëwúdfë në úlúm-úlúmú hanndal ki wa ⁴² wonu tih : « Yaa Yéésú koy Suseef neh hanaa ? Yen yúhú boffi a yaafi ! Di wona' biti dí kola' sun díh ? » ⁴³ Yéésú won wa tih : « Yéfi yee na wonu ron hanndal kon ña. ⁴⁴ Ow mínéh sèe

‡ **6:31** 6.31 maan :Wa peppi sewte, wa man pëndë miraa nen. Daa wa ñama húmú on Koope bëy Israyel koluu wa Ésip homute luufa níi hente kiil sabay iniil (40) ra. ✧ **6:31** 6.31 Saame Kolohi koyyi Israyel Ésip 16.4, 15 ; Kañaa ya 78.24

deefid hém Boffa wol so' ra yejeh ri soo na ; te so', may kélid bëyí baaha búudé yiin nay túkkíyé ëldúnë rë. ⁴⁵ Yonente ya bíníyúté yii beh : “*Wa béeb, Koope ay waa teeb.*”✧ Bëyí síkírëh Boffa béeb te keloh woni, deefidte so'. ⁴⁶ Baa homay won biti ow ëlídte Boffa. So' fa kola' Koope na ra kut daa mi ot dí. ⁴⁷ Mee ron won kaaf ka ra ee : bëyí gém sè' liilte pesa na dúméh rë. ⁴⁸ Daa mi ñama na ona' pes da. ⁴⁹ Caaccee ke ron ñamu maana luufa ra húlúy è ? ⁵⁰ Ndaa dee man ñama kola' sun yee ra, bëyí ñam na béeb ii húl. ⁵¹ Daa mi ñama kola' sun, na ona' pes ra. Bëyí ñam na ñami yeh, fay pes faw. Ñama nay mii onee ra daa faan so' ; may rii ona' nda bëewë pes. »

⁵² Unna won Yéesú yaa ra tahte yëwúdfë béyrúté unni wa sun, na capuu hanndal ki wa wonu tih : « Bëyí bee mínë' yen yed faani dí níi yen ñam ? » ⁵³ Di won wa tih : « Mee ron won kaaf ka ra ee : don ñamuy na faan so' mi Koy-bëe' te don hanuy na ñif mi so', don ii naa liil pesa. ⁵⁴ Bëyí ñam na faan so' te ri han na ñif mi so', liilte pesa na dúméh rë te may rii kélid búudé yiin nay túkkíyé ëldúnë rë. ⁵⁵ Faan so' ñamad kah-kah, ñif mi so' han kah-kah. ⁵⁶ Bëyí ñam na faan so' te han na ñif mi so', dí pokohte soo na te mi pokohte díi na. ⁵⁷ Baaso' fa wol so' ra ee pes da, te daa ri tah mi na pes ; ti daaha nen, bëyí ñam na faan so', daa may tahe dí pes. ⁵⁸ Ñama kola' sun-Koo ra daa reeni. Bani yee húmú ñamu caaccee ke ron húlú rë maduy. Bëyí ñam na ñami yah, fay pes faw. » ⁵⁹ Na yëeddë'

✧ **6:45** 6.45 Saame Isayii 54.13

Yéésú unni yaa ra, deef di húmú filib tígë na daguu yëwúdfë Koope ra, di Kafarnawum.

Taalibe ya heguu ra

⁶⁰ Síkirúu wë Yéésú níi wocce ra, i ow caak di taalibe yi wonu tih : « Unna won di ra nebeh keloh ! Wa ay tahuu díh ? » ⁶¹ Bi yúhíd Yéésú afi biti taalibe ya úlúm-úlúmú wona won di unni yaa ra, di won wa tih : « Baa daa ñogol don a ? ⁶² Don ot so' mi Koy-bëe' mi saye sun nimil tígë kola' mi raa, don ay page yih ? ⁶³ Ruuhi Koope daa na ona' pes. Ow tikkiyay yin. Unna won mi don ra kola' Ruuhi Koope na, te daa wa na tah ow pes. ⁶⁴ Ndaa i ow don na gémúy sè'. » Yaaha béeb, deef Yéésú maañcee yúh bëewë gémúy rí rë, a bëe' nay rii yaaye ra. ⁶⁵ Di baatte won tih : « Yii baa daa tah mi won don biti ow mínéh sée deefid, hém Baaso' tahreh ri ri. »

⁶⁶ Kola'te baaha, ow caak di taalibe yi heguute, wocute ñéerë' a ri. ⁶⁷ Tígí daaha, Yéésú won taalibe yi sabboo a ana ya tih : « A don, don nampi fahuuy saañ neh a ? » ⁶⁸ Simonj Peer loffe ri won tih : « Yíkëe, fun ay ñee tal wah ? Daa fu na won unna na kúdf ow pesa na dúméh rë. ⁶⁹ Fun gémúté, te fun yúhúté biti daa fu Bëyí selaa dúhë' Koope na ra. » ⁷⁰ Yéésú won wa tih : « Daa mi tanis don fi sabboo a ana ya neh a ? Añcañ, ow yínë don na seytaane gaan ! » ⁷¹ Deef di wona' Yudaas koy Simonj Iskariyot. Di fi Yudaas, nona' ri taalibe yi sabboo a ana ya níi, daa ri nay rii yaaye.

7

Yéésú a mboko yi

¹ Filoon fi baaha, Yéésú hompe filib Galile na wër ; di fahaay pay Yúdée ndah baha yi yëwúddë fahuu hawi húl. ² Filib fi baaha béeb, bi na leboh ndaje ma na homuu yëwúddë düttë rë, ³ koy-yaayyi wonu ri tih : « Kolee dee fu saañ ndaje mín Yúdée, nda taalibe ya béeb ot iñi éemilë' yë na paṅ fu ra. ⁴ Bëyí faha' biti yúhú na dapeeh paṅi iñi. Fu mín paṅ iñyee raa kay, feheye níi bëy ëldúnë béeb yúh rë. » ⁵ Nagajek, wa fi koy-yaayyi gémúy rí. ⁶ Yéésú won wa tih : « Wahtii so' lahay doom ; ndaa don, wahtu ya béeb wun don na. ⁷ Bëewë mínih rën kaa', ndaa wa kaa'uute so' di yee teeḃa' mi wa biti pagadfi wa bosse ra. ⁸ Don fi yaa tilí don saañ feedin. So' mi saay, ndah wahtii so' lahay doom. » ⁹ Filoon fi unnee ke ri yah, di tasse Galile daaha.

Yéésú filib feedi yëwúddë

¹⁰ Sayuu koy-yaayyi yi ndaje min ra, di fi Yéésú nampee naa saañ ndaṅ feey, ow yéeh baaha. ¹¹ Baha yi yëwúddë homute filib ndaje ma na saamu ri, na meeluu tigë wad dii homa ra. ¹² Úlúm-úlúmí ban fi Yéésú misikke filib fi bëewë. Yee na wonu biti di bëyí wunte, yee kaa'uute na wonu biti di yaha' nuffi bëewë yahoo. ¹³ Di filib yaaha béeb, ow kaañay bëyífi uni sun, ndah wa helute nuf baha yi yëwúddë në.

✧ **7:2** 7.2 Saame Tali Léwí 23.34-36 ; Nérsí Kootaa 16.13

14 Tíle' feeda ní lahte leelaa ra, Yéésú saañce haalte Faam fi gaani Koope na yéeddé'.
 15 Yéwúdfé éémúté dee na yéeddé' rí rē, wonu tih : « Di yúhè' íñi caakki yee dih, te ri yooday ? »
 16 Yéésú loffe wa won tih : « Íña na yéeddé' mí rē d'úhēey soo na, d'úhē' Koope fa wol so' ra.
 17 Bèyí canje pañi yee neba' Koope ra ay yúh nda íña na won mi ra kola' Koope na, nda mi won woni so'.
 18 Bèyí wona' woni, saamda' afi ndam. Ndaa so' fa saama' ndami bēe' wol so' ra, mi yéeh fel, mi wona' kaah.
 19 Mèyíis yeray ron Kootaa a ? Añcañ, ow yínē d'on na pagay yee won dī ra ! Don fahuu hawi so' húl yih ? »
 20 Bèewē wonu ri tih : « Yébitēh ham d'o neh a ? Daa faha' hawu húl ? »
 21 Di won wa tih : « Mi pañ kimtaan yínē kut d'on béeb éémúté !
 22 Èlsí affon ! Mèyíis nahte ron leji tunka. Te yii baa dalaay dīi na, kola' ní caacci na. Biti Mèyíis daa nah ron ri, d'on na pagu ri wuti yaha bisa na hílsúu rē, te ñogoleh ron.
 23 Kon d'on ham kootii Mèyíis, d'on mín lec kúkēy bisa na hílsúu rēe, d'on ngaaruu so' yi paya pay mi ow múlgús bisi baaha ra ?
 24 Ngēnē èlí rek d'on yíppí aattiya', lah èettíyí kaah. »

Buura Koo fal ri ra kola' dih ?

25 Filoon fi baaha, i ow di bēy Yerusalem wonu tih : « Bee daa bēe' na fahuu hap húl rē saa ?
 26 Èlsí di na wona' ri sun te ow hégíyēey. Kélfē yē habuuy kah-kah biti daa ri Buura Koo fal ri ra a ?
 27 Wonuy biti Buura Koo fal ri ra yahti ac daa ow ii yúh tígē nay rii kolee ra a ? Bèyí bee nék yen yúhú tígē kola' ri ra ! »
 28 Filíbf yéeddé'í

di Faam fi gaana, Yéésú béyídté uni sun won tih : « Don wonu ti don yúhú sē' a tígè kola' mi ra ! Yúhí biti nék nebaay so' neboo rek mi acce, bëe' mit wēelíyèh rē daa wol so', te don yíih rí. ²⁹ So' nék mí yúh rí ndah mi kola' hēbísí, te daa ri wol so'. » ³⁰ Tígí daaha, lahte bëewí na fahuu hami, ndaa bi lahay wahtii, ow tíkēy rí ya'. ³¹ Di filib yaaha bëeβ, lahte bëewí caakki gémúté rí, wonu tih : « Buura Koo fal ri ra ac daa ay paŋ kimtaanni luk yee paŋ bëyí bee ra a ? »

Wola'i hami Yéésú

³² Yee na úlúm-úlúmú bëewē sun fi Yéésú rē sítē' rí nuffi farisenŋa, ñani kélfē yí seeyoh ya yejute i ow di wohoh yi Faam fi gaani Koope hami. ³³ Lahuu wa ra, Yéésú won bëewē tih : « Mi talla'te hom filib fon ní fíi yutuud, mi anti saañ ðeefri bëe' wol so' ra. ³⁴ Ay tíl ní don ay soo saam ndaa don ii soo ot, ndah don mínih lah tígè nē saañ mi ra. » ³⁵ Yēwúddē na wonantuu filib fi wa tih : « Di ay saye di ní yen mínih nēe lah ? Di saañ ðeefri yēwúddē tasaaruu ginni bëewí kayya ra neh, ði yeel hom dín fē yēeddé bëewí kayya ginni yaaha a ? ³⁶ Yee wona' ri biti ay tíl ní yen ay rii saam ndaa yen ii rii ot, ndah yen mínih lah tígè nē saañ ði ra, ði faha' won yi na ? »

Culli mulaa na ona' pes ða

³⁷ Bisa míllē' feeda ra daa ri bisa lukki lah solo ra. Yiin fin fa, Yéésú canke fíi bëewē, béyídté uni won tih : « Bëyí sifiroh, aya soo na mi on ði han. ³⁸ Bëyí gém soo na, di bíníyúu rí Téerēe, culli mulii na ona' pes ay julli keeñi. » ³⁹ Di hom

woni tígí daaha bití ðëewë nay rii gémé rë ay liil Ruuhi Koope. Jamanu yi yaaha, ðeef Koope cépírëy Ruuha sun fi ðëewë gémú rë, ndah ðeef ðí teeþaay ndami Yéésú doom.

Taasa'i ðëewë sun fi Yéésú

⁴⁰ I ow filíð fi ðëewë keluu wa unni yah, wonu tih : « 'Bëyí bee daa Yonentaa kaah ! » ⁴¹ Lahte yi wonu tih : « Daa ri Buura Koo fal ri ra ! » Ndaa lahte yi tahute wonu tih : « Buura Koo fal ri ra mín ðúhë' Galile a ? » ⁴² Bíníyúy Téerëe bití *Buura Koo fal ri ra ay coosaanee tali Dawit te ri ay ðúhëe Betle'em*✧, gina húmú dék Dawit ra a ? » ⁴³ Af Yéésú tahte wonni ðëewë kéldëey. ⁴⁴ I ow waa na fahuu hami, ndaa ow tíkëy rí ya'.

⁴⁵ Nimiluu wohoh yi Faam fi gaani Koope húmú wolu ra, kélfë yí seeyoh ya a farisenja meelute wa yee tah wa kúrëelúuy Yéésú rë. ⁴⁶ Wohoh ya wonu wa tih : « Iña won bëyí baa ra, ow mësëy wëe won ! » ⁴⁷ Farisenja wonu wa tih : « 'Bëe' kúrëelëhté ðon bal a ? » ⁴⁸ Don olute kélfë mbée farisenj yínë gémpe rí ë ? ⁴⁹ Bëewë gémú rí rë yíh yin kootii Mëyíis ! Wa ay alkoh ! » ⁵⁰ Nikodem fa non wa fi farisenja, te húmú pëyídté ðeefri Yéésú rë won wa tih : ⁵¹ « Kootii yen onay yen bití yen daan ow te ðeefa yen síkíríih rí ní yen yúh yee pañ ðí ra. » ⁵² Wa wonu rí tih : « Kon fu dék Galile ðo bal ! Kúnsé Téerëe fu saam nda yonente yínë kut wadtee ðúhë' Galile raa ! » [⁵³ Filoon fi baaha, wa hasluute suute faam.

✧ **7:42** 7.42 Saame 2 Samiyel 7.12 ; Mísée 5.1

8

Belaa habuu a yaal ra

¹ Yéésú kola' daaha, saañce daŋi Élíiffë. ² Kéy baab fin cúb, dī nimilte Faam fi gaani Koope, bëewë béeb deefrute ri. Di tookke na yeedídf wë. ³ Hom homo níi, i ow di yëeddëh yí kootii Mëyiis a i fariseŋ kúrúte belii habuu a yaal. Wa tikúte rí fii bëewë béeb, ⁴ wonu Yéésú tih : « Bahaa, belii bee habuu a yaal. ⁵ Te di filib Kootaa, Mëyiis túuycé yen tap mani belii bee la' níi rí húl. Do nék, fu won yi na ? » ⁶ (Woni baa béeb, wa homu fiirí Yéésú, nda wa mín lah yii yabun wa ri.) Ndaa Yéésú sigimpé, bebpe kuni yampe na fiis feey. ⁷ Bi caguu wa Yéésú na sehu biti dī lof wa, dī béyídté aŋi won wa tih : « Ow di don na, bi mësëy bakaad, débëe rii tap. » ⁸ Di antee sigímëet, yampe na fiisëet feey. ⁹ Keluu wa unni yah, dala'te yee lukuu baha ra, wa sayuu yínë-yínë níi Yéésú a belaa kep daa tasu, belaa caŋke hompe tígë hom dī ra. ¹⁰ Di béyrëetté aŋi, won belaa tih : « Bëewë kúrú rë dee ra di yaa ow ? Kon lahay bëyí daana ro waa na a ? » ¹¹ Belaa won dī tih : « Lahay, bahaa. » Yéésú won dī tih : « So' bal, mi daanay ro. Fu mín saañ, ndaa kola'te woteh ngana bakaaril. »]

Yéésú daa niiñi ëldúnë

¹² Yéésú wonaat bëewë filib Faam fi gaani Koope tih : « Daa mi niiñi ëldúnë ; bëyí ñee tal so' wocce tīl ñúus, dī ay tīlé niiña na ona' pesa na dúmëh rë. » ¹³ Tígí daaha, fariseŋŋa wonu ri tih : « Gaad na peleh kukuumi ! Ow mínëh tah biti fu won kaah. » ¹⁴ Yéésú won wa tih : « Wuti

mi seedeyid af so' raa, mi won kaah. Mi yúh tígè kola' mi ra a tígè na saañ mi ra ; ndaa d'on, d'on yíih tígè kola' mi ra ní púlé tígè na saañ mi ra. ¹⁵ Dee na aattiyuu d'on da, homa' olad' ow ; so' mi na aattiyeeh ow. ¹⁶ Ndaa tíl ní mi aattiya' raa, lah tēhí biti ri kaah ndah funi af so' na neh ; funi Baaso' fa wol so' ra daa na ñéerúu nē. ¹⁷ Kootii ron wonay biti tígí seedeyuun ow ana, deef kaah woo ? ¹⁸ Kon mi seedeyid af so', te Baaso' fa wol so' ra seedeyid so' bal ! » ¹⁹ Tígí daaha, wa wonu ri tih : « A boffu dih d'o ? » Di tahte won wa tih : « Don yíih sé', d'on yíih Baaso'. Don yúh sé' koon, d'on ay yúh Baaso'. »

²⁰ Na won Yéésú unni yaa ra, deef d'i na yéeddé' filiḅ Faam fi gaani Koope, hēbís tígè na bekuu sarah ya ra, ndaa ow étdēy hami, ndah deef wahtii lahay doom.

Tígè na saañ Yéésú rē

²¹ Yéésú wonil wa tih : « Mee saañ da ee ; d'on ay soo saam ndaa d'on ay húlée filiḅ bakaad'don. Don mínih lah tígè nē saañ mi ra. » ²² Tígí daaha, yēwúdfē wonantuu hanndal ki wa tih : « Mbaa ri faha' naadoh daa tah d'i won biti yen mínih lah tígè na saañ d'i ra neh ? » ²³ Yéésú won wa tih : « Don dékú feey, éldúní beh, ndaa so' mi dékéh nē, mi dék sun. ²⁴ Yii baa daa tah mi won d'on biti d'on ay húlée filiḅ bakaad'don. Mee ron won ra ee d'on gémúy biti daa mi[☆] raa, d'on ay húlée filiḅ bakaad'don. » ²⁵ Wa meelute ri wonu tih : « Daa fu wa kon ? » Di won wa tih : « Mi maañcee ron ri dal won bín fē ní a d'eh ! ²⁶ Mi

☆ **8:24** 8.24 Saame Kolohi koyyi Israyel Ésip 3.14-15

caakke yii mín mí won sun fon, a yii mín mí ron aattiya', ndaa mi léhín bëy ëldúnë iña won so' bëe' wol so' ra, te dī fi bëyí baa wona' kaah. »
²⁷ Bi yíh wë bití Yéésú wona' wa Boffa sun, ²⁸ dī baatte won wa tih : « Tíl níi ñon béyíd so' mi Koy-bëe' rëe, ñon ay yúh bití daa mi, te ñon ay yúh bití ma na koleeh rek mi pañ yin, ndaa mi léhínë' iña yëedíd së' Baaso' ra. ²⁹ Te dī fi bëe' wol so' ra funi ñéerúu, dī yedday so' a af so', ndah mi dékë' pañ yee neba' ri ra. » ³⁰ Filiḅ woni iñyah, i ow caak gémúté rí.

Kaah daa na pëkís ow

³¹ Tígí daaha, Yéésú won yëwúddë gémú rí rë tih : « Don pokoh unna won mi ron ra raa, ñeef ñon taalibe yi so' kaah. ³² Hen ñaaha raa, ñon ay yúh kaah te kaaf ka ay ron pëkís, ñon laha' affon. » ³³ Wa wonu ri tih : « Fun séttí Abraham, fun mësúy hen ñaam ! Fu wona' fun bití fun ay laha' affi fun dīh ? » ³⁴ Yéésú won wa tih : « Mee ron won kaaf ka ra ee : bëyí pañ bakaad béeb, ñeef dī ñaam bakaad. ³⁵ Te ñaam noneh faam, ndaa koy non faam faraah. ³⁶ Kon so' mi Koy ka daa mi pëkísë ron raa, ñon ac bëewí lahuute affon kaah. ³⁷ Mi yúhté bití ñon séttí Abraham ndaa ñon fahuu hawí so' húl, ndah iña won mi ron ra haaleh affon. ³⁸ So' mi wona' iña ot mi Baaso' na ra. Don nék, ñon paguu iña keluu ron boffon na ra. » ³⁹ Wa wonu Yéésú tih : « Abraham daa boffi fun. » Yéésú won wa tih : « Don henun koyyi Abraham kaah koon, tin ñon ñeyun kotti. ⁴⁰ Ndaa ñon paguy bah, ñon na anuu faha' hawí so' húl ndah mi wona' ron kaaf ka keloh mi Koope na ra. Iña na pagu ron ra,

Abraham mësëy wëe paŋ. ⁴¹ Don paguu di na paga' boffon kep. » Wa wonu Yéésú tih : « Fun koyyi píyúu waal neh ! Fun lahuu baap yínë, te ri Koope. » ⁴² Yéésú won wa tih : « Koope daa yaha Boffon kaah koon, tin ðon faha' so', ndée mi kola' ðii na, te daa ri tah mi ac. Nebaay so' neboo rek mi acce, daa ri wol so'. ⁴³ Yi tah ðon kéliih woni so' ? Mi ot na : woni so' haaleh affon daa tah. ⁴⁴ Seytaane daa boffon tígí-tígí ! Paŋ yii neba' ði fi boffon, neba'te ron. Dalaana níi a ðeh, ði mësí sanjku ow sanjukuyo. Di mësëy ñéerë' a kaah, ndah kaah íníh ðii na. Di home fel raa, ði na hélléeh yínë sah. Di pesa' fel, te fel coosaana' ðii na. ⁴⁵ Ndaa so' mi beh, mi wona' kaah daa tah ðon gé múy iña na won mi ðon ra. ⁴⁶ Wa di ðon na daa mín caŋ won yii nay teebee biti mi bakaadte ? Kon mi won kaah raa, yi kaa' ðon gé m iña na won mi ra ? ⁴⁷ Bëyí non bëewí Koope, kela' iña na won ði Koope ra. Ndaa ðon nëníh bëewí daa tah ðon kéliih iña na won ði ra. »

⁴⁸ Yëwúððë wonu Yéésú tih : « Fun wonuy kaah biti nagajek fu heedi bëy Samari, te yébitëh daa ham ðo a ? » ⁴⁹ Di nampee waa won tih : « Yébitëh habay so' ! So' kay mi yed Baaso' cér ; ðon daa yeruy so' cér ! ⁵⁰ So' mi saamday af so' ndam. Lahte bëyí daa na saamid' so' ri te daa ri na aattiya'. ⁵¹ Mee ron won kaaf ka ra ee : bëyí ñee woni so', ii mësí húl. » ⁵²⁻⁵³ Wa wonu ri tih : « Wëerté leegi biti yébitëh daa ham ðo ! Fu haba' biti ðee fu luk ciffi fun Abraham gaan a ? Abraham húlté, yonente ya húlúté, fantee won biti bëyí ñee wonu ii mësí húl ë ? Fu tík

afu yih ? » ⁵⁴ Yéésú won wa tih : « Mi dëmndëe af so' raa, ay lahee njiriñ mi bih ? Baaso' kay daa na on so' ndam. Don wonu ti dī Koope fon, ⁵⁵ don anutee rii yíih. So' mi bee mi yúh rí. Mi won biti mi yéeh rí rëe, mi ac feloh ti don nen. Ndaa mi yúh rí, te mi ñeya' woni. ⁵⁶ Keeñ ciffon Abraham sosse níi sos séentë' rí biti mi ac ayo ra ; dī otte te keeña sosse. » ⁵⁷ Wa wonu ri tih : « Fu ola' Abraham dīh, te fu lahay kiil sabay iip (50 doom ? » ⁵⁸ Yéésú won wa tih : « Mee ron won kaaf ka ra ee : balaa Abraham límú, daa mi. » ⁵⁹ Tígí daaha, wa na píyú i la' ay yeese ri, Yéésú múuycé filib bëewë, dúhté Faam fi gaani Koope.

9

Bëe' límú búumídf dë

¹ Filoon fi baaha, Yéésú hom waal otte bëyí límú búumídf. ² Taalibe yi meelute ri wonu tih : « Bahaa, bakaadfi bëyí bee daa tah dī límú búumídf mbée bakaadfi boffi a yaafi ? » ³ Yéésú won wa tih : « Ñeyaay dīi na, ñeyaay boffi a yaafi na. Don ot dī búum, Koope daa faha' ñeya' dīi na, teeḅa' doolii. ⁴ Na'a bééḅ, yen warun pañ légéyí bëe' wol so' ra ; te leñ Koo elek, ow ii naa mín légéy. ⁵ Homi so' ëldúnë bééḅ, daa may niñle bëewë. » ⁶ Kola' ri woni unni yah, Yéésú tuulte feey, túpëlsë'té muluuc ma a feey fa, dī antee waa leef illí búumndë, ⁷ won dī tih : « Paye fu súlmée laahi Silowe. » (Iti fi tii Silowe daa wolu wolo.) Búumndë payte dín fë súlmëhté, nimilte yeelte.

⁸ Oluu ri bëewë wani dékú rë a yee na olu ri merees dī na saraatoḅ ra, wa na wonantuu

hanndal ki wa tih : « Bee bëe' hómú took na saraatoh ra saa ? » ⁹ Lahte bëewí wonu tih : « Yaa dí ! » Lahte yi wonu tih : « Èe-èe', yaa dí neh, wa madu mado rek ! » Bëe' won wa tígí daaha tih : « Yaa so' kay ! » ¹⁰ Tígí daaha, bëewë meelute ri wonu tih : « Yi daa wédís íllú ? » ¹¹ Di won wa tih : « 'Bëe' hínú Yéesú rë daa hilsid feey, leeffe íllí sè' antee soo nah mi pay súlmëh laahi Silowe. Mi payte dín fë, mi súlmëhté íllí sè' wërsëhté. » ¹² Bëewë meelute ri wonu tih : « 'Bëe' hom dih ? » Di won wa tih : « Mi yéeh tígë hom dí ra ! »

¹³ Wa koluu daaha, beyute bëe', kúrúté rí farisenja na. ¹⁴ Deef Yéesú hilsid feey fa wédíssé íllí bëe' yiin bisa na hílsúu yëwúdfë rë. ¹⁵ Wa fi farisenja bal namutee meel bëe' dee wërsë' íllí rë. Di won wa tih : « Di leef so' feey hilsid íl, mi súlmëhté, mi yíppée yeel. » ¹⁶ Tígí daaha, lahte farisenja wonu tih : « 'Bëe' pañ yii baa ra mínëh hen bëyí Koope daa wol ri, ndah dí ñeyay yee won kootii bisa na hílsúu rë. » Ndaa lahte bëewí wonu tih : « Bakaaroh mínë' pañ kimtaanni man dee díh ? » Daaha, wonni wa kéldëey. ¹⁷ Farisenja meelaatute bëe' wonu ri tih : « A dfo, fu won yi bëe' wédís íllú rë ? » Bëe' won wa tih : « Di yonente ! »

¹⁸ Di filib yaaha béeb, kélfë yí yëwúdfë kaa'uute gém biti bëe' na ot bee ra hómú búumídf. Yii baa tahte wa woluute boffi a yaafi, ¹⁹ meelute wa wonu tih : « Won ti bëyí bee koohon kaah te ri límú búumídf ë ? Yi tah dí na ot leegi kon ? » ²⁰ Boffa a yaafa wonu wa tih : « Yee yúhú fun dfa biti dí koy fun sah-sah, te ri límú búumídf kaah. ²¹ Yee tah níi dí na ot leegi ra nék,

fun yíih rí, a fun yíih bëe' pay dī ra bal. Méelí rí dī teeb ron ! Di kúkëy woo ? » ²² Biti wa kaañuy kélfë yí yëwúdfë daa tah wa lofa' d'ah, ndah deef wa fi kélfë yí yëwúdfë pokute bití bëyí won ow bití Yéésú daa Buura Koo fal ri ra, ay líkú tígë na daguu yëwúdfë Koope ra. ²³ Yii baa daa tah wa won bití wa meel ri, dī kúkëy neh.

²⁴ Fariseŋŋa dëekëetúté bëe' hómú búum dë, wonu ri tih : « Fun yúhúté bití bëe' na wona' fu ra bakaaroh ! Wone kaah di tii Koope. » ²⁵ Di won wa tih : « Di yaha bakaaroh mbée bakaaroh neh béeb, mi yéeh yin na. Yee yúh mí rë bití mi hómú búumídf, mi yeelte leegi. » ²⁶ Tígí daaha, wa meelute ri wonu tih : « Di paŋ dō yih ? Di hen d'íh níi payce íllú ? » ²⁷ Bëe' won wa tih : « Mi hómú wonte ron baaha, don kaa'uute síkírëh. Don fahuu bití mi wonaat don baaha yih ? Don fahuu hen taalibe yi man bitih ! » ²⁸ Tígí daaha, wa solsuute ri anutee rii won tih : « Do kay, daa fu taalibii bëyí bah ! Ndaa fun, fun taalibe yi Mëyíis. ²⁹ Fun yúhúté bití Koope wonte a Mëyíis, ndaa dī fi bah, fun lukki yíih tígë kola' ri ra sah ! » ³⁰ Bëe' tahte won wa tih : « Don yíih tígë kola' bëe' rë, te ri payce íllí sè' ! Baa daa yee téy af ra ! ³¹ Yen yúhúté bití Koope na taheh d'añ bakaaroh, ndaa bëyí neeh ri, ñee woni te paŋ yee faha' ri raa, dī tah d'añi. ³² Bití ow payce íllí bëyí límú búumídf níi na yeel, kéllyú ! ³³ Kon bëe' paŋ yii baa ra Koo daa wol ri ; henay baa koon dī mínéh paŋ kimtaan. » ³⁴ Fariseŋŋa wonu ri tígí daaha tih : « Límúu fú níi a d'eh, fu mëssi hen bakaaroh, antee won daa fay fun yëeddé ë

? » Wa koluu daaha, líkúté rí tígè na ðaguu ra, ðúhrúté rí èssín.

³⁵ Kela' Yéésú bití farisenḡa líkúté bée' tígè na ðaguu ra, ðí ðeefidte ri, won ðí tih : « Fu gémpé Koy-bée' è ? » ³⁶ Bée' won ðí tih : « Teeḡ so' ri ḡahaa, nda mi gém dí. » ³⁷ Yéésú won ðí tih : « Fu otte ri, daa ri na won ðoo na. » ³⁸ Tígí daaha, ðí yekke fíi Yéésú na jaamiyoh ri, won tih : « Yíkée, mi gémpé rē. » ³⁹ Yéésú antee won tígí daaha tih : « Mi ac aattiya' feey fi beh, nda búumídfē yeel, te bēewē na yeelu ra yíssēh búumídf. » ⁴⁰ Lahte farisenḡi húmú daaha, keluu wa unni yah, wa meelute Yéésú wonu ri tih : « Fun i búumídf fun ḡal a ? » ⁴¹ Yéésú won wa tih : « Don yahun búumídf koon, tin ḡon ii lah bakaaf ; ndaa ḡon wonu ti ḡon olu na, yii baa daa tah bakaafḡon dék ḡon na ! »

10

Níirēhē a harri

¹ Yéésú tíkké won wa tih : « Mee ron won kaaf ka ra ee : bēyí ñeyaay ílí gélgí harra, anti ḡara buut ñeyaa na, bēyí baa lohoh, ðí banndi. ² Ndaa bēyí haalaa gélgē ílē, ðeef daa ri níirēhí harra. ³ Di fi bah, wohohi yuba ay rii kúnsídf, te harra laha' ri ra ay yúhsē' una. Di ay ñee tii yi wa ðeek wē, ðúhídf wē èssín. ⁴ Di ðúhídf wē bēeḡ níi woc raa, ðí kēllēh, harra ñee talí, bi yúhsúu wē uni. ⁵ Wa ii ñee tal bēyí wa yíih rí nék ; wa ay rii hegee hegoo kay, ndah wa yíih síih una ! » ⁶ Yéésú ñeya'te wa léehí bah, ndaa wa yíih yee faha' ri waa won ḡa.

7 Tígí daaha, Yéésú wonaat wa tih : « Mee ron won kaaf ka ra ee : daa mi ílí gélgí harra. 8 Bëewë húmú këllúu sè' dee ra bééβ, húmú i lohoh a i banndi, yii baa tahte níi harra síkírúuy wë. 9 Daa mi ílë. Bëyí ñeya' soo na haal, ay múc ; dí ay mín haal, dí d'úhé, dí lah yii pesaa ri faraah. 10 Lohoh aya' loh, bëem a sanjku kut. So' nék, mi ac biti bëewë pes, wa pes pesi neβpe. 11 Daa mi níiréhí kah-kah fa. Níiréh kah-kah hom gara' ñíini garoo harri na. 12 Súrgé nék, dí lahaay harra ; dí níiréh kah-kah neh. Di ole gúmú aye rek, dí hegoh, gúm fë yejoh sun fi harra, hasla' yuba. 13 Súrgíi baa ay mínée hen ðaaha, ndah dí séentéh hélíis légéyí kut, harra tahay dí koloh. 14-15 Daa mi níiréhí kah-kah fa. Di yúhë' sè' Baaso' mi yúhté rí, so' mi yúhë' harri so' ðaaha wa yúhúté sè'. Te af wa ay tah mi yera' ñiin sè'. 16 Mi lahte harri kayyi ínih gélgí beh, te mi wadtee waa níid' bal ; wa ay yúhsë' un so', wani yee boolla' bééβ hen yup yínë, níiréhë hen yínë. 17 May yera' ñiin sè', mi liilaat dí. Yii baa daa tah Baaso' faha' so'. 18 Ow mínéh bek ñiin sè' feey, daa mi mín díi yera'. Daa mi mín díi yera', daa mi mín díi liilaat. Baaso' túuy sè' yii baaha. »

19 Unna won Yéésú yaa ra tahte yëwúdfë kéldúuy won. 20 Ow caak waa na wonu tih : « Nagajek ðon síkírúu wa ? Bee yébitëh daa ham dí bee ra a ? Bee yulkid bee ra a ? » 21 Ndaa lahte bëewí na wonu tih : « Bëyí yébitëh daa ham dí na woneeh ðeh ! Yébitëh mín wédís íl búumíd è ? »

22 Feedi yëwúdfë, bee na nérsúu jéβëlë jéβélú

Koope Faam fi gaana ra lahte. Feedi baa húmú Yerusalem jamanii sosa. Jamanii baaha filiḅ feeda, ²³ Yéésú na tíléesèh tígè nè wonuu Mbaar mi Salomoo di filiḅ Faam fi gaana ra. ²⁴ Tígí daaha, yëwúdfë ayute gíiwuté rí, wonu ri tih : « Fay home dee fu kúné affi fun níi kirih ? Daa fu yaha Buura Koo fal ri ra raa, won fun baaha ! » ²⁵ Di won wa tih : « Yee meelu so' ḁon ḁa, mi húmú wonte ḁon ḁi, ndaa ḁon gémúy sè'. Añcaḅ, iña na paḅ mi di tii Baaso' ra seedayidte so', ²⁶ ndaa ḁon gémúy sè', af biti ḁon nëníh harri so'. ²⁷ Harri so' yúhsúu un so' ; so' mi yúh wë, te wa ñeyuu tal so'. ²⁸ May waa on pesa na ḁúméh rë. Mii waa mëssi ñak, te ow mínéh wëe naaf ya' so'. ²⁹ Baaso' daa ḁéḅéén sè' wë, te daa ri lukki gaan bééḅ. Ow mínéh naaf yin ya' Baaso'. ³⁰ Funi Baaso' daa lígínúu yínë. »

³¹ Wona' Yéésú uni bah, yëwúdfë yabaatute na píyú la' ay rii bëemé, ³² ḁi won wa tígí daaha tih : « Mi paḅke iñi wunni caakki Baaso' daa nah so' wa. Yii bih di iñyah daa tah ḁon na fahuu bëemí sè' a la' ? » ³³ Wa lofute ri wonu tih : « Fun fahuuy hawu húl biti fu paḅ yin wun, ndaa biti fu solte Koope. Fu ow kut, fu na anti tík afu Koope a ? » ³⁴ Yéésú won wa tih : « Bíníyuté filiḅ téeríi kootii ron biti Koope won tih : “*Don i koope.*”[☆] ³⁵ Yee won Téerëe rë ow mínéh ríi nís maan ? Bëewë Koope yulid' woni waa na ra, ḁi wona' wa biti wa i koope neh a ? ³⁶ A so' fa Baaso' fal so', wol so' ëldúnë rë, ḁon wonuu biti mi sola' Koope soloo ḁíh di yee wona' mi biti mi

☆ **10:34** 10.34 Saame Kañaa ya 82.6

Koy Koope ra ? ³⁷ Hena biti mi pagay yee nah so' Baaso' raa, ngënë gémí sè' ! ³⁸ Ndaa mi paṅ wa raa, wuti don gémúy iña na won mi raa sah, gémí iña na paṅ mi ra book, nda don ham affon biti Baaso' ee soo na, te mi ee dīi na. » ³⁹ Wona' Yéésú unni yah, wa yabaatute na fahuu hami, ndaa dī fússé wë.

⁴⁰ Yéésú kola' dah sayilte hatni yíníi laahi Yurdeṅ, tígè nè hómú bētsè'Saṅ Batis bēewë rë, dī hompe daaha. ⁴¹ I ow caak dēefute ri daaha. Bēewë na wonantuu hanndal ki wa tih : « Kimtaan yínè sah Saṅ pagay ri, ndaa iña won dī sun fi bēyí bee ra bēéβ kaah. » ⁴² I ow caak gémuté Yéésú daaha.

11

Kolohi Lasaar búudé

¹⁻² Hómú laha' bēyí keente jér hínú Lasaar. Di hómú dék Betani, bani koy-yaayyi beleβ Mari a Martaa. Mari daa belaa nay túmé laakkoloña kotti Yíkëe, an waa moos a fen fi ra. ³ Koy-yaayyi beleβbi ana ya wolute ow woni Yíkëe biti kooji jérí. ⁴ Kela' dī fi Yéésú baaha, tígí daaha dī won tih : « Jéri Lasaar jér húlëe neh ; Koo ay ñeye na teeβa' gaanaa ki ndami ; hen daaha raa, ndami so' mi Koy Koope yúhú. »

⁵ Yéésú hómú kooji Martaa, Mari a Lasaar. ⁶ Di filiβ yaaha bēéβ, kela' ri biti Lasaar jérí dë, dī hompe tígè hom dī daaha ra níi hente waal ana, ⁷ dī antee won taalibe yi biti bani wa ñéerè' nimil Yúdéé. ⁸ Taalibe yi wonu ri tih : « Bahaa, maañay-maañay rek fu na fahuu bēem a la' dín fë, fan naa faha' nimil a ? » ⁹ Di won wa tih : «

Na' homa' wahtu sabboo a wahtu ana neh a ?
 'Bëyí tíl na' ii kabinoh ndah dī ot kotti na niiñi
 feey fi beh. ¹⁰ 'Bëyí tíl ñúus nék ay kabinoh ndah
 niiña ínìh dīi na. » ¹¹ Filoon fi bee wona' ri unni
 yaa ra, dī baatte won wa tih : « Kooji yen Lasaar
 nee'te, ndaa may pay mi yúun dí. » ¹² Taalibe yi
 wonu ri tih : « Yíkëe, dī nee' nee'o saa ? Kon dī
 ay wah ! » ¹³ Taalibe ya habuu biti rek Yéésú won
 wa woni nee' pëní, ðeef dī won wa biti Lasaar
 húl húlë. ¹⁴ Tígí daaha, Yéésú míllë' wëe won tih
 : « Lasaar húlté. ¹⁵ Don tahute keñ so' sosse di
 yee ðeefay so' ri dín fë rë. Di laha' ri daaha daa
 nay tahe ðon gém. Këlíi yen lah dīi na ! » ¹⁶ Tígí
 daaha, Toomaa fa na ðëekúu Síisë rë won taalibe
 yi kayya tih : « Yen ðal yen saañ húlé a kélfíi yen
 ! »

¹⁷ Tíluu Yéésú a taalibe yi níi wa tíimuté gina
 ra, dī kelohte biti Lasaar húlté níi nee'te waal
 iniil feey. ¹⁸ Betani wulaay a Yerusalem ; hanndal
 ki wa wafti hena kilomet éeyë. ¹⁹ I yëwúf caak
 ayute yéíi Martaa a Mari na mësdu wë húlí koy-
 yaafi wa. ²⁰ Kela' Martaa biti Yéésú ee ac ða, dī
 saañce téebílehí ; ndaa Mari tasse faam. ²¹ Tee'a'
 Martaa a Yéésú rë, dī won dī tih : « Fu homa dee
 koon Yíkëe koy-yaaso' húléh. ²² Ndaa mi yúhté
 biti níi a ðeh, yii fu ðañ dī Koope béeb, dī ay
 roo rii on. » ²³ Yéésú won dī tih : « Koy-yaafu ay
 koloh búudé. » ²⁴ Martaa won dī tih : « Mi yúhté
 biti dī ay koloh yiin nay kolee bëewë búudé rë
 biti ëldúnë túkkí. » ²⁵ Yéésú won dī tih : « Daa
 mi na këlíf bëewë búudé, daa mi na on wa pes.
 'Bëyí gém soo na wuti dī húl rëe sah, dī ay pes
 ; ²⁶ te bëyí në pes, gémpé së', ii mëssí húl. Fu

gémpe baaha a ? » ²⁷ Martaa won tih : « Íi Yíkëe ! Mi gémpe bití daa fu Buura Koo fal ri ra, Koy Koope fa húmú wonu bití daa nay aye èldúnè rè. »

²⁸ Filoon fi wonni yah, Martaa saañce dëegi Mari koy-yaafi, mëddë'té rí won dī tih : « Yëeddëhë acce, te ri won fu ac fu tiil ri. » ²⁹ Kela' Mari woni bah, dī yippée koloh saañce téebílëhí Yéésú. ³⁰ Wahtii baa ðeef Yéésú haalay gina doom, dī húmú lís tígë tee'uu ðani Martaa ra. ³¹ Yëwúððë húmú faam fa na mësdú Mari ra, oluu wa Mari yippée koloh na dūh faam fa, wa ñeyute tala. Wa habuu bití dī saañ looy luuyin. ³² Laha' Mari tígë hom Yéésú ní ri otte ri ra, dī yedðohte kotta feey, won dī tih : « Fu homa dee koon Yíkëe koy-yaaso' húlëh. » ³³ Ola' Yéésú Mari na foñ, bëewë ñéerúu a ri ra na fogu bal ra, keeña dūmpé ces, afa kúnëhté, ³⁴ dī meelte wa won tih : « 'Don ðapuu ri dih ? » Bëewë wonu ri tih : « 'Bahaa, aye fu ot. » ³⁵ Yéésú yampe na looy. ³⁶ Tígí daaha, yëwúððë na wonu hanndal ki wa tih : « Èlí dī húmú faha' ri ri kan ! » ³⁷ Ndaa lahte yi na wonu waa na tih : « 'Dí fa pay illí búumndë rè, dī mínëh kaa' Lasaar húl koon a ? »

³⁸ Keeñ Yéésú dūmëetté ces, dī lahte luuyin. Luuya, kili kúnúu a la' gaan. ³⁹ Dī won bëewë tih : « Píníní la'a ! » Martaa koy-yaafi húlëhë won dī tih : « 'Búudé fë wadtee yah Yíkëe, hente waal iniil woteh, dī ee deh. » ⁴⁰ Yéésú won dī tih : « Mi wonay ro ri wono a ? Fu gém soo na raa, fay ot ndami Koope. » ⁴¹ Tígí daaha, la'a pínínúté, Yéésú bëyídté afi, yeelte sun-Koo won

tih : « Baap, mi na sím dë di yee taha' fu daji so' ra. ⁴² Mi yúhté bití wahtii dagaa mi ro béeb fu tahid so', ndaa fu ot mi won dī sun, bëewí yee glíwú sè' yee ra daa tah, nda wa gém bití daa fu wol so'. » ⁴³ Woca' ri woni baa ra, dī béyídté uni sun won tih : « Lasaar, d'uhé deh ! » ⁴⁴ Lasaar fa hómú húl rē d'úhté, kotta, ya' ya a afa béeb líiwúté boy. Yéésú won tígí daaha tih : « Nísí boyya faana don yeris dī tíl. »

Peeni hawi Yéésú húl

(Saame Maccée 26.1-5 ; Marka 14.1-2 ; Lúkkë 22.1-2)

⁴⁵ Ow caak di yëwúdfë hómú faam Mari te olute iña na pañ Yéésú rē, gémúté dīi na. ⁴⁶ Ndaa i ow waa na payute olute farisenja, bílluté wë iña pañ ri ra. ⁴⁷ Tígí daaha, kélfë yí seeyoh ya a farisenja dëekuté bëy këemí gaani yëwúdfë béeb, wonu tih : « Yen ay hene díh bal ? Bëyí bee ee pañ kimtaanni caakke ra dé' ! » ⁴⁸ Yen took yen olsee ri page iñyeh, bëewë béeb ay gém dīi na, te bëy Rom ay koloh dakaya' Faam fi gaani Koope a heedi yen ! » ⁴⁹ Lahte bëyí hínú Kayif waa na, kíilí baaha dëef daa ri hómú seeyohi gaana, won wa tih : « Yin íníh affon ! » ⁵⁰ Don yíih bití ow yínë kut ñak ñíiní ndah bëewë, daa gén bití heedi yëwúdfë béeb sanju a ? » ⁵¹ Yee won dī baa ra kolaay dīi na nék. Kíilí baaha, bi daa ri hómú seeyohi gaana, Koope daa wondoh ri daaha teeba'i bití Yéésú ay húlíd heedi yëwúdfë. ⁵² Te ri ii teem húlídí yëwúdfë don, dī ay húlélé koyyi Koope béeb, dī négirë' yee hasлуу ra, wa hen yínë.

⁵³ Kola'te yiin fin fa, kélfë yí yëwúdfë habute biti wa ay hap Yéésú húl. ⁵⁴ Yii baa tahte dī wocce haal filib fi yëwúdfë. Di kolohte saañce waal luufa di gina na wonuu Efarayim ra, dī hompe daaha a taalibe yi.

⁵⁵ Leba' Paagi yëwúdfë rë, ow caak di bëy gina koluute na suu ðukutoh a sehi feeda Yerusalem.

⁵⁶ Wa homu filib Faam fi gaana na saamu Yéésú, na meelantuu filib fi wa wonu tih : « Di ayoh feeda aa dī ayoh neh ? Don wonu yi na ? »

⁵⁷ Kélfë yí seeyoh ya a farisenña nahuute wonu tih : « Bëyí yúh tígë hom dī ra, teebaa ri, dī habu. »

12

Mari yíinté Yéésú laakkoloñ kot

(Saame Maccëe 26.6-13 ; Marka 14.3-9)

¹ Waal pëenë balaa feedi Paaga, Yéésú kolohte saañce Betani, tígë dék Lasaar fa dī hómú kélídf dī búudé rë. ² Laha' ri daaha ra, dī pagirute ñam. Martaa daa na hómú norsa' ñama. Lasaar hómú non bëewë boku a Yéésú loon ra. ³ Mari nampee beþ bútéel laakkoloñ, yi yugusuu naarde kah-kah te kofeelte, bi mitte genwal lítër, yíinté wë kotti Yéésú, na an waa moos a fen fi. Faam fa béëþ líiwëlsë'té a ngedi laakkoloña. ⁴ Yudaas Iskariyot, ow di taalibe yi Yéésú, bee millë' rii yaay ra, won tígí daaha tih : ⁵ « Laakkoloñi yee yaayeeh hélíis caak koon cadum fa yeru ñëkídfë ë ? » ⁶ Yee won dī baa ra, dī wonday ri ñëkídfë dé' ! Biti ri lohoh te daa ri yef keesi wa, dī núhë' në tilé sohle yi daa tah. ⁷ Yéésú won dī tígí daaha tih : « Baale jaambura

afi ! Di waay hacadi so' daa tah dī yef wa nī a dēh. ⁸ Ñēkíd ii koloh filiḅ fon ; ndaa so' mi bee mii hom filiḅ fon dee faraah. »

Cañi yēwúdfē hawi Lasaar

⁹ I ow caak di yēwúdfē keluu wa biti Yéésú ín Betani ra, wa suute dín fē. Af dī neh doṅ daa kúdf wē nē, ndaa olaalohi Lasaar fa dī kélídf dí búudé rē. ¹⁰ Tígí daaha, kélfē yí seeyoh ya habute biti Lasaar ay hawu húl bal, ¹¹ ndah af dī tahte yēwúdf caak helute wa, gémúté Yéésú.

Haali Yéésú Yerusalem

(Saame Maccēe 21.1-11 ; Marka 11.1-11 ; Lúkkē 19.28-40)

¹² Kéy fín fē, bēewí caakka hómú ayu feedi Paaga ra keluute biti Yéésú ee ac Yerusalem ra. ¹³ Wa saamute soor-soor, d'úhúté gina na téebílúu rí, béyrúté unni wa sun na njoofu ri wonu tih ; « *Oosaanaa ! Koo-Yíkēe barkela bēe' dī wol ri ra ! Koo barkela buuri Israyel !* »[✧] ¹⁴ Deef Yéésú hómú saampe cúmbúr mbaam. Di yaagohte sun ti di bíníyúu rí Téerēe bitih : ¹⁵ « *Ngēnē néekíñú, don fi bēy Siyoṅ ! Ēlí ! Buuron ee ac da, yaagoh cúmbúr.* »[✧] ¹⁶ Filiḅ fi iñyaaha béeb, taalibe ya hómú yíih iti fi wa ; ndaa tílē' nīi Koope teeḅa'te ndami Yéésú rē, nuffi wa onte wa biti yee hómú bíníyú Téerēe rē won sun fi, te ri laha' daaha. ¹⁷ Bēewē hómú a Yéésú na won dī Lasaar d'úh nuṅa kélídf té rí búudé rē, bíllúté yee olu wa ra. ¹⁸ Daaha, ow caak keluute biti Yéésú pañke kimtaani bah, wa ayute téebílēhí.

✧ **12:13** 12.13 Saame Kañaa ya 118.25-26 ✧ **12:15** 12.15 Saame Sakari 9.9

19 Tígí daaha, farisenḡa na wonantuu filiḡ fi wa tih : « Yen mínih yin na ! Bëewë béeb ñeyuu tala ! »

Gerekka na saamu Yéésú rë

20 Bëewë ayu feeda Yerusalem jaamiyohi Koope ra, lahte Gerekki húmú filiḡ fi wa. 21 Wa lebuute Fílíp fi bëy Betsaydaa fa hom Galile ra, wonu ri tih : « Bahaa, fun fahuu oli Yéésú koon. » 22 Fílíp payte wonte Anndere baaha, wa béeb ana ñéerúuté léhíni Yéésú. 23 Wonuu wa ri baa ra, Yéésú won wa tih : « Wahtaa nay teebee Koope ndami so' mi Koy-bëe' rë lahte. 24 Mee ron won kaaf ka ra ee : pep bele teem pep bele kep biti ñiinë haaleh feey. Ndaa ñiinë haal feey raa ay dúhíd pep caak. 25 Ti daaha nen, bëyi pokoh ñiiní ay rii ñak ; ndaa bëyi kaa' pokohi ñiiní ëldúnë fi beh ay lah pesa na dúmëh rë. 26 Bëyi hen súrgii sè' ñeya tal so' ; te tígí hom mi, dí ay home na bal. Bëyi hen súrgii sè', Baaso' ay rii béyíd.

Woni Yéésú yii lenke húlí

27 « Tígë homa' mi bee ra, af so' kúnëhté níi mi yéeh yii wona mi ! Mbaa may wone Baaso' biti sëmlë' sè' wahtii coono fa na saañ mii pese bee ra neh ? Ndaa coono fi baa daa tah mi ac feey nék ! 28 Kon Baap, teebee ndamu ! » Tígí daaha, un dfohte sun won tih : « Mi teeḡpe bëewë ndami so' níi wocce, te may waa rii teeḡaat. » 29 Bëewë húmú daaha keluu una ra wonu tih : « Yaa híniḡ ! » Lahte yi wonu tih : « Malaaka daa won díi na ! » 30 Ndaa Yéésú won wa tih : « Uni baa wondfuy so', wondú fon ! 31 Wahtaa

wadti aattiyuun äldúnë rë lahte ; kélfëe hom afa ra ay líkú leegi. ³² Te so', mi béyrú mi paa' feey fa sun raa, may héc bëewë béeb soo na. » ³³ Wonee ke Yéésú bah, dī teeβa' dee nay rii húlée rë. ³⁴ Bëewë wonu ri tih : « Yee yoodu fun téeríi kootii yen ra biti Buura Koo fal ri ra ay pese peso faraah. Kon fu wona' biti Koy-bëe' ay keru sun díh ? Koy-bëe' fë wah ? » ³⁵ Di won wa tih : « Niiña ee filib fon ndaa ri tallaay yin caak. Kon tíli niiña bee homa' ri don na bee ra, toñeh ñúusë beetti ron, ndah bëyí til ñúus yéeh tígë na saañ dī ra. ³⁶ Gémí niiña bee homa' ri filib fon da, nda don hen bëy niiña. »

Wona' Yéésú iñyaa níi wocce ra, dī hécëhté, dapohte wa.

Kaa'a'i yëwúdfë gém

³⁷ Kimtaanna paŋ Yéésú fii bëewë rë béeb, taheh wa gém dí. ³⁸ Yee húmú won yonente Isayii ra laha'te dah. Di húmú won tih : « *Yíkëe, daa gém yee wonu yen ra ? Yíkëe, fu teeβ bídí ya'u wah ?* »*

³⁹ Isayii wonte yee tah bëewë mínih gém rë, won tih :

⁴⁰ « *Koope búumílté wë, súhílté keeñni wa, toñeh wa ay ole, keeñni wa ay kúnsée ndín wa lof pesad, mi pay wa yee homuu wa ra.* »*

⁴¹ Isayii húmú wona' Yéésú bín fë, deef dī séenté ndami. ⁴² Filib fi yaaha béeb, kaa'eeh ow caak di kélfë yí yëwúdfë gémúté Yéésú. Ndaa bi

* **12:38** 12.38 Saame Isayii 53.1 * **12:40** 12.40 Saame Isayii 6.9-10

helu wa nuf farisenḡa na, wa kaañuy rii teeḡa' toñeh wa ay líkú tígè na ḡaguu yèwúḡḡè Koope ra, ⁴³ ndah bití ow daa kaña wa, daa génèl wè bití Koope daa kaña wa.

Iña won Yéésú rē daa na aattiya'

⁴⁴ Yéésú béyíḡté uni won tih : « Bèyí gém soo na, gémèy soo na doḡ, ḡí gémpeḡ bēe' wol so' ra bal. ⁴⁵ Bèyí ot so', ḡeef otte bēe' wol so' ra. ⁴⁶ So' mi ac èldúnè hawaanri bēewè, nda bēyí gém soo na dékéeh ñúusè. ⁴⁷ Bèyí keloh woni so' te ri ñeyeh na, daa may ri daane neh, ndah mi ac sèmlè'í bēy èldúnè ndaa daani wa neh. ⁴⁸ Bèyí fahaay soo ot te kaa'a'te keloh woni so', iña won mi ra nay rii aattiyee yiin nay túkkíyè èldúnè rē. ⁴⁹ Nagajek, mi kolaay koloo rek mi na won, Baaso' fa wol so' ra daa túuy sè' won iña yeeddè' mí rē. ⁵⁰ Te mi yúhté bití yee túuyè' rí rē daa na ona' pesa na ḡúmèh rē. Ti ḡaaha nen, iña na won mi ra, mi wona' wa ti di naha' so' wa Baaso' nen. »

13

Hosi Yéésú kotti taalibe yi

¹ Bisa míllè' balaa Paagi yèwúḡḡè rē lahte. Yéésú yúhté bití wahtaa waḡ ḡíi koloh èldúnè, ḡí ḡeefiḡ Boffi ra lahte. Di mēssí faha' bēewée ké rí nay rii hele feey fa ra fahoo. Te ri teebpe wa ḡee faha' ri wa níi tígí teem faha' ra.

² Yéésú a taalibe yi homu reer, ḡeef Seytaanaa bekke Yudaas koy Simoḡ Iskariyot nufa nay rii yaayee Yéésú rē. ³ Yéésú yúhté bití Boffi tíkké iña béeb ya'i, ḡí yúhté bití bal ḡí kola' ḡíi na

te ri ay nimile dīi na. ⁴ Daaha, dī kolohte loona, níssé búubí, ðeðpe ndíimú moosaa pokke kinohi, ⁵ antee ðeð if, túmpé muluð, ñeete taalibe yi na, na hos kotti wa ; bi ri hosid' dī kotti béeð, dī moosid' dī wa a ndíimée pok dī kinohi ra.

⁶ Laha' ri Simonj Peer na ra, Peer won dī tih : « Do fi Yíkée, fu hosid' so' kotti so' a ? » ⁷ Yéesú won dī tih : « Fu yéeh iti fi yee na pañ mi ra doom, fay rii yúhé fayu. » ⁸ Peer won dī tih : « Damaay fu hosde so' kotti so' ! » Yéesú tahte won dī tih : « Mi hosday ro kottu raa, ðeef hanndal ki yen d'úmpé. » ⁹ Peer won dī tih : « Kon Yíkée, ngana teem kotti so' kut, lahe níi ya' yi so' a af so' bal ! »

¹⁰ Yéesú won dī tih : « Bëyí kola' ðoohoh, faana béeð lante, sohlaay dī ðoohlee*. Don fi yee ðon ladute, ndaa ðon béeð daa ladu neh. »

¹¹ Deef Yéesú yúhté ðee' nay rii yaaye ra, daa tah dī won biti wa béeð daa ladu neh.

¹² Hosa' Yéesú kotti taalibe yi níi wocce ra, dī bekaatte búubí, tookaatte loona, antee waa won tih : « Don yúhú iti fi yee pagid' mi ron ra a ? » ¹³ Don ðeekúu sē' yeeddēh a Yíkée, te ðon wonu kaah, mi dī. ¹⁴ Hém so' mi Yíkēen, so' mi yeeddēhēn, daa mi hos kotton raa, kon ðon warutee hosanta' kot hanndal kon bal. ¹⁵ Don ot mi pagid' ðon yii bah, ðeef mi faha' biti ðon pagee ri ðaaha. ¹⁶ Mee ron won kaaf ka ra ee : súrgē lukeh kélfii gaan, ðee' wolu ra lukeh ðee'

* **13:10** 13.10 sohlaay dī ðoohlee :Bëwē húmú ñeyaatu unni yee bín fē wora'i wa bëwē rē, lahte na yi húmú biniyú yii beh : henay hosi kotta, sohlaay dī ðoohlee.

wol ri ra gaan. ¹⁷ Bee yúhúu ron iñyaa leegi ra, don ñee na raa, keeññon ay sos. ¹⁸ Mi wonaay don béeb nék ! Mi yúh bëewë tanis mi ra. Ndaa yee bíníyú Téerëe rè wadti laha laho. Téerëe won tih : *“Bëe' funi woruu mbúurú sè' rè, daa millè' hen kaa'ohi so'.”* ✧ ¹⁹ Mi wonte ron baaha abah balaa wahtaa lah. Hen daa wahtaa lah raa, don ay gém biti daa mi ✧. ²⁰ Mee ron won kaaf ka ra ee : bëyí tah bëyí daa mi wol ri a ya' ana, ðeef dī tah so' ; te bëyí tah so', ðeef dī tah bëe' wol so' ra. »

Bëe' nay yaaye Yéésú rè

(Saame Maccëe 26.20-25 ; Marka 14.17-21 ; Lúkkè 22.21-23)

²¹ Woca' Yéésú woni baa ra, afa kúnëhté pak, dī won tih : « Mee ron won kaaf ka ra ee : ow di don na ay soo yaay. » ²² Taalibe ya yíih bëe' na wona' Yéésú rè, wa na yeelantuu affi wa. ²³ Ow di taalibe ya, kooji Yéésú, húmú hëbísí. ²⁴ Tígí daaha, Simon Peer panke yodad, nahte ri meel Yéésú bëe' na wona' ri ra. ²⁵ Taalibee sígimpé nuf Yéésú, meelte ri won tih : « Fu wona' wa Yíkëe ? » ²⁶ Yéésú loffe won tih : « Mee saañ soop mbúurú loona ra ee : bëe' nay mi rii yere ra, dī bëyí baaha. » Tígí daaha, Yéésú bebpe mbúurú, sooppe ri loona, yedte ri Yudaas fi Simon Iskariyot. ²⁷ Yudaas na tah mbúurëe, Seytaane na haal ri. Yéésú won dī tih : « Yee nay fuu page ra, page ri gaaw ! » ²⁸ Ow yínë sah di wa fi taalibe ya húmú loona ra, yéeh yee faha' rii won da. ²⁹ Bi Yudaas daa yef keesi wa, i ow

✧ **13:18** 13.18 Saame Kañaa ya 41.10 ✧ **13:19** 13.19 Saame Kolohi koyyi Israyel Ésíp 3.14-15

waa na habuu biti Yéésú nah ri pay saam iña nay waa sohlee feeda ra, mbée nah ri komi ñëkídfë sarah. ³⁰ Taha' Yudaas mbúurëe rë, dī yíppée dūh ëssín. Wahtii baaha dëef Koo elekke.

Túuyë'í hasa

³¹ Dúhë' Yudaas ëssín dë, Yéésú won tih : « Leegi Koope teeḃa' ndami so' mi Koy-bëe', mi teeḃa' ndami dī fi Koope. ³² [Te mi teeḃa' ndami Koope raa,] Koope ḃal ay teeḃa' ndami so', te ri yuloh pañi, maañlay. ³³ Yee talla' mi hom filiḃ fon dā gaanlay yaawe ! Don ay soo saam, ndaa cëe mí won don yee won mi yëwúdfë rë : don mínih lah tígë në saañ mi ra. ³⁴ Mee ron yed túuyë' has dā ee : lah fëhëntii hanndal kon. Di faha' mi ron, lah fëhëntii dāaha hanndal kon. ³⁵ Don fahanta' hanndal kon raa, tígí daaha bëewë bëeḃ ay yúh biti don taalibe yi so' . »

Woni Yéésú biti Peer ay taasa' yúhí

(Saame Maccëe 26.31-35 ; Marka 14.27-31 ; Lúkkë 22.31-34)

³⁶ Filoon fi baaha, Simon Peer meelte Yéésú won tih : « Fu saañ di Yíkëe ? » Di loffe Peer won tih : « Tígë homu yen bee ra kep fu mínéh ñee tal so' níi fu lah tígë na saañ mi ra, sehe níi fayu, fay naa lah. » ³⁷ Peer won dī tih : « Yíkëe, yi tah mi mínéh ñee talu leegi ? Mi tahte ñagi ñiin së' ndah dō ! » ³⁸ Yéésú won dī tih : « Fu won kaah biti fu tahte ñagi ñiinú ndah so' a ? Mee roo won kaaf ka ra ee : añañ, fiisiin ki paan, fay taasa' biti fu yúh së' níi hen waal éeyë. »

14

Yéésú daa waala yulid Boffa na ra

¹ Yéésú antee won taalibe yi bééβ tih : « Affon banay kúnēh ! Gémí Koope, te đon gém sē' bal !
² Faam Baaso' hanke ; may pay mi waayid đon tígí nay ron home. Henay baa koon mi woneh ron dī !
³ Mi pay mi waayid đon dī níi woc daa, may nimil mi kali ron. Hen daaha raa, tígē nay mii home ra, đon ay home na bal.
⁴ Don yúhú waala yulid tígē na saañ mi ra. »
⁵ Toomaa won dī tígí daaha tih : « Yíkēe, fun yíih tígē na saañ fu ra, fun ay yúhée waala yulid na ra dīh ? »
⁶ Yéésú won dī tih : « Daa mi waala, daa mi kaaf ka, daa mi na ona' pesa. Ow mínēh pay Boffa na te ñeyeh soo na.
⁷ Don yúhú sē' rēe kay, đon ay yúh Baaso' bal ! Te dala'te woteh, đon yúhúté rí te đon olute ri ! »

⁸ Fílíp won dī tígí daaha tih : « Yíkēe, teeβ fun Boffa kut, fun sohluuy yin kay. »
⁹ Yéésú won dī tih : « Fílíp, maaña maañ mi filib fon da bééβ fu yéeh sē' doom a ? Bëyí ot so', deef otte Boffa ! Kon fu wona' biti mi teeβ đon Boffa dīh ?
¹⁰ Fu gémey biti mee Baaso' na, te ri ee soo na a ? Unna won mi đon ra bééβ, kolaay soo na, dī fi Boffa hom soo na ra kay daa na pañ légéyí.
¹¹ Gémí sē' di yee wona' mi biti mee Baaso' na, te ri ee soo na ra. Don gémúy unna won mi đon yaa raa, iña na pañ mi ra wadtee tah đon gém book !
¹² Mee ron won kaaf ka ra ee : bëyí gém sē', dī fi bëyí baa bal ay pañ iña na pañ mi ra. Di ay pañ yi luk waa gaan sah, ndah mi saañ Boffa na,
¹³ te yii đon đañ dī bééβ, đon ñeya' ri tii so',

may ron rii pagid, nda so' mi Koy ka mi teeḅa' ndami Boffa. ¹⁴ Yii ḁon ḁaṅ ḁi, ḁon ñeya' ri tii so', may rii paṅ.

Gapa'i Yéésú Ruuh-Peseṅ

¹⁵ « Don faha' so' raa, ḁon ay ñee iña na túuy mí ḁon ḁa. ¹⁶ Daaha raa, may ḁaṅ Baaso' kom ḁon Dímlèh kay, bi ay home ḁon na faraah. ¹⁷ Daa ri Ruuha na teeḅ ḅëewë kaaf ka ra. Bëewë feey fi bee mínih ríi haba' Dímlèh, ndah wa oluy ri, wa yíih rí. Don nék, ḁon yúhú rí ; ḁi ee filib fon te ri ay home ow fi ow ḁon na faraah. ¹⁸ Mii ron yedḁa' baayu, may ayaat ḁon na. ¹⁹ Tasse yutuud fii ḅëewë feey fi bee ii soo olil, ndaa ḁon ay ot biti mee pes ḁa, te ḁon bal ḁon ay pes. ²⁰ Bín fë rëe, ḁon ay yúh biti mee Baaso' na, ḁon ewu soo na, te mi ee ḁon na. ²¹ Bëyí ham iña na túuyë' mí rë aḁi te ri ñee na, ḁeef ḅëyí baa faha'te so'. Bëyí faha' so', Baaso' ay rii faha' ; so' bal may rii faha' te may rii teekiroh. »

²² Taalibee na wonuu Yudaas, bokaay a Yudaas Iskariyot ra, won Yéésú tih : « Yíkëe, yi tah fay teekiree fun, fii teekiroh ḅëewí kayya ? » ²³ Yéésú won ḁi tih : « Bëyí faha' so', ay ñee iña na won mi ra ; Baaso' ay faha' ḅëyí baaha, te funi Baaso' ay haal ḁii na, fun dék ḁii na. ²⁴ Bëyí fahaay so', na ñeyeh iña na won mi ra. Te iña na keluu ḁon maa won wa ra, kolaay soo na, wa kola' Baaso' fa wol so' ra.

²⁵ « Mi won ḁon iñyah bee homa' mi leeloon bee ra. ²⁶ Lahte Dímlèhí ee ac filoon fi so' ra, daa ri Ruuh-Peseṅ fa nay wolee Baaso' di tii so' ra. Di nay ron yëeddé ḅééḅ, ḁi nédís ḁon iña won

mi ron ra béeb. ²⁷ Mi saañ sayo, ndaa may ron helid jaamma, jaammaa laha' mi ra. Mii ron rii hella' ti di na paguu ri bëy ëldúnë nen. Affon banay kúnëh, te ngënë tíití. ²⁸ Don keluute woni so' ron biti mi saañ sayo ndaa may ayaat don na ra maan ? Don faha' so' koon, saaña na saañ mi Baaso' na ra, keeññon ay naa sose soso. Mi saañ Baaso' na, Baaso' fa luk soo gaan da. ²⁹ Mi wonte ron baa leegi balaa iñyaa lah, nda bín fë rëe, don gém. ³⁰ Mii wonil caak a don, ndah kélfii feey fi bee ee ac da. Di mínéh yin soo na, daa may rii yedfee yee nay lahe ra. ³¹ Yaaha béeb, nda bëewë yúh biti mi faha'te Baaso' te mi paga' yee na nah ri so' ra. Kélii yen saañ ! »

15

Yéésú daa tal béeeñi kah-kah fa

¹ Yéésú wonil tih : « Daa mi tal béeeñi kah-kah fa, te Baaso' daa na tooppitoh tal béeeñë. ² Ya'i tokoh so' mi tal béeeñë béeb te límëy, Baaso' ay rii lec. Ndaa bi na lím, di ay rii yugus ní lan, di baatti lím. ³ Don fi yee nék, don yugusute ní don ladute. Unna won mi ron ra daa yugus don ní don madute daa lan. ⁴ Kon pëkii soo na ti di poka' mi don na nen. Ya' béeeñi tokaay tala, bani afi kep dín mínéh lím ; ti daaha nen, don a affon kut don mínih dúhíd njiriñ hém don pokuuy soo na.

⁵ « Daa mi tal béeeñë, don daa ya' ya. Bëyi pokoh soo na, te mi pokoh dii na ay dúhíd njiriñ mi gaante. Don mínih pañ yin deefa don pëkiih soo na. ⁶ Bëyi pokaay soo na ay betu ti ya' béeeñi lecu leco, betute súhté nen ; ya' yi béeeñi man dah

ay luuhu luuhu, betu kii wa tam. ⁷ Don pokoh soo na, te don ham unni so' don na raa, dēgí yii neba' ron, don ay rii liil. ⁸ Ndami Baaso' yúhúu biti don d'uhíd njiriñ caak, don teeβa' biti don taalibe yi so'. ⁹ Di faha' so' Baaso', mi faha' ron daaha. Pésíi filib faha'a faha' mi ron ra. ¹⁰ Di ñeya' mi túuyë' yí Baaso', mi na pes filib faha'a faha' di so' ra, don ñee túuyë' yí sē' rēe, don ay pesee daaha filib faha'a faha' mi ron ra.

¹¹ « Don ot mi won don yii bah, mi faha' biti sosi keeñ so' hom don na, te sosi keeñon mit sēk. ¹² Túuyë'í sē' daa ri beh : Di faha' mi ron, lah fēhēntíi daaha hanndal kon. ¹³ Lahay bēyí faha'te ow níi luk bēyí tah yera'i ñíni af kooyi. ¹⁴ Don pañ yii won mi don raa, deef don kooyi so'. ¹⁵ Mii ron dēekiil sūrgē, ndah sūrgē na yēh yii pañ kēlfíi. Mi dēekē' rēn kooy, ndah mi teeβpe ron iña kola' mi Baaso' na ra bēeβ. ¹⁶ Don neh daa tansu so' ; daa mi tanis ron. Daa mi fal ron, mi wolte ron, don d'uhíd njiriñ, njiriñ mi na d'uméh. Hen daaha raa, yii don dañ di bēeβ, don ñeya' ri tii so', Baaso' ay ron rii on. ¹⁷ Filib iñyaa bēeβ, mi faha' woni ron biti lah fēhēntíi hanndal kon.

Taalibe ya a bēewē feey fi beh

¹⁸ « Don ot bēewē feey fi bee kaa' ron, yúhí biti wa d'ebúu kaa' so'. ¹⁹ Don nonun bēy feey fi bee koon, tin wa ay ron faha' ndah don nonu waa na. Ndaa mi tanisse ron mi d'uhídté rēn waa na, tahte don nēnlíh waa na. Yii baa daa tah wa kaa' ron. ²⁰ Nérsíi yee húmú won mi ron biti sūrgē lukeh kēlfíi gaan da. Bēewē moklute so' raa, kon wa ay ron mokil ; yee ñeyu woni so'

ra ay ñee wonnon bal.☆ 21 Yii wa paŋ dī don béeḅ daa mi tah, ndah wa yíih bée' wol so' ra. 22 Hena biti mi ayay te mi wonay a wa koon, tin wa ii habuu bakaaroh. Ndaa tígë homuu wa bee ra kep, wa lahluy layaa. 23 Bëyí kaa' so', deef kaa'a'te Baaso' bal. 24 Hena biti mi pagay kimtaanni ow kay mësëy wëe paŋ fíi wë koon, tin wa ii habuu bakaaroh. Leegi wa olute kimtaanni so', wa anutee kaa' funi Baaso' béeḅ. 25 Yee bíníyú téerii kootii wa ra laha'te dah. Bíníyúté bitih : *“Yee kaa'uu wa so' ra lahay dala !”*☆ 26 Dímléhí ron ac ayo : daa ri Ruuha na teeḅa' kaaf ka ra. Ruuha kola' Boffa na. May ñee'ee Baaso' na mi wola' ron ri, te ri ay soo seedeyid. 27 Te don bal, don ay soo seedeyid ndah yen daa hómú dalaana níi a deh. »

16

1 Yéésú baatte won tih : « Don ot mi won don yii bah, nda don banti sélít. 2 Yúhí biti don ay líkú ílíyyë na daguu yëwúddë Koope ra ; te ay tíl níi sah, bëyí yahti ron bëem ay rii habee biti jaamiyoh Koope. 3 Biti wa yíih Boffa te wa yíih so' bal daa nay tahe wa paŋ yii baaha. 4 Mi won don yii baaha biti lah na bín fë rëe, don nérsëh yee hómú won mi ron ra. Biti mi mësí hom leeloon daa tah mi wonay ron yin na daluu yen ñéerë' bín fë níi a deh.

Pagadfi Ruuh-Peserj

5 « Leegi mee saañ bée' wol so' na ra, te ow di don na meelay so' tígë në saañ mi ra. 6 Yee

☆ 15:20 15.20 Saame Maccëe 10.24 ☆ 15:25 15.25 Saame Kañaa ya 35.19 ; 69.5

won mi don baa ra tahte keeññon dúmpé ces. ⁷ Añcañ, mi won don kaah : biti mi saañ daa gén don na. Nagajek, mi saay raa, Dímlèhè wadti ac don na ra ii ayil ! Ndaa mi saañ daa, may ron dñi wola'. ⁸ Te ri ac daa, dñi ay teeb bëy èldúnè biti wa homuy kaah di yii lenke dee na oluu wa bakaad da, dee na oluu wa júb dë, a dee na oluu wa aattiya' ra : ⁹ wa homuy kaah di yii lenke bakaad, ndah wa gé múy sè' ; ¹⁰ di yii lenke júb, ndah mee saañ Baaso' na ra, te don ii soo ollil ; ¹¹ di yii lenke aattiya', ndah kélfii feey fi bee daanute níi wocce.

¹² « Mi talla'te iñi caakki wona mi ron, ndaa tígè homuu yen bee ra kep wa dameh affon. ¹³ Ruuha na teeβa' kaaf ki Koope ra ac daa, dñi ay don ñéyídf kaaf ka béeb. Iña nay rii wone ra ii kola' dñi na, dñi ay wone iña keloh ri ra, dñi teeb don yii nay lahe. ¹⁴ Daa ri nay teeβee ndami so', ndah dñi ay beyee iña soo na, teeb don wa. ¹⁵ Yii Baaso' daa laha' ri béeb, daa mi laha'. Daa tah mi won don biti Ruuha ay beyee iña soo na, teeb don wa. »

Yee nay yíssíré súfúñ fë sos-keeñ ra

¹⁶ Yéésú wonil taalibe yi tih : « Tasse i waal fíi don ii soo ot, tikèh i waal don an soo olaat. » ¹⁷ I ow di taalibe yi na wonantuu hanndal ki wa tih : « Di faha' won yi biti tasse i waal yen ii rii ot, tikèh i waal raa yen an dñi olaat ? Di faha' won yi biti bal dñi saañ Boffa na ? » ¹⁸ Wa na wonaaluu wonu tih : « I waal fi bah, dñi faha' won yi na ? Ow yéeh yee na faha' rii won ra kat ! » ¹⁹ Yéésú otte biti wa fahuu meeli, dñi won wa tígí daaha tih : « Yee wona' mi ron biti tasse i waal don ii

soo ot, tíkēh i waal raa đon an soo olaat ra, đon meelantuu baaha a ? ²⁰ Mee ron won kaaf ka ra ee : đon ay foŋ đon hawoh, deefa bëy ëldúnë homun sos-keññ ; đon ay súfúñ lool, ndaa súfúñ fë ay yíssëh sos-keññ. ²¹ Loo beleb ham raa na misik đii na, ndah đeef lowa daa lah ; đĩ múc đëe nék, đĩ hal misiga keeña sos níi sos, ndah đĩ kúdté koy ëldúnë. ²² Don bal, tígë homuu đon bee ra, đon homuu misik a súfúñ ; ndaa may ron olaat, keeññon ay sos te ow ii mín kaa' keeññon sos. ²³ Bín fë rëe, đon ii soo meellil yin. Mee ron won kaaf ka ra ee : yii đon đaŋ đĩ béeb, đon ñeya' ri tii so', Baaso' ay ron rii on. ²⁴ Níi a deh, đon ñeyuy tii so' đon đagute yin. Mantee đëgí, đon ay liil ; đaaha, keeññon ay sos dotooy. »

²⁵ Yéesú antee tík won tih : « Iña won mi ron yaa ra béeb, mi ñeya' wa léeh. Wahtu ín ac fíi rë nék mii ron wonliil đaaha, may ron wonee iñi Baaso' bëñéet. ²⁶ Bín fë rëe, đon ay ñee'ee tii so' đon đaŋ Boffa. Mi wonay ron biti may ron đagire đii na, đon daa nay đagire affon. ²⁷ Di fi Boffa faha'te ron ndah đon fahuute so', te đon gémúté biti daa ri wol so'. ²⁸ Mi kola' Boffa na mi acce ëldúnë. Leegi may koloh ëldúnë, mi nimil Boffa na. » ²⁹ Taalibe yi wonu ri tígí daaha tih : « Di deh ! Fu wonte wonni lante te fu ñeyaay léeh. ³⁰ Biti fu yúh béeb te sohlaay ow meelle ro yin, haalte affi fun leegi, daa tah fun gém biti fu kola' Koope na. » ³¹ Yéesú won wa tih : « Don wonu kaah biti đon gémúté leegi a ? ³² A' ! Wahtaa ee saañ lahe ra kat, te ri lahte níi wocce, wahtaa nay ron hasлуу ra, ow fi ow đon na béeb nimil faam wa, đon hel so' njundun ! Añcaŋ, mi

homay a af so' njununṅ kat, ndah Baaso' ee hēbís sē' ! ³³ Don ot mi won don iñyah, nda don pokoh soo na, don lah jaamma. Don ay mok ēldúnē nék ! Ndaa lah hēbí híin, mi banke nguur ki ēldúnē ! »

17

Dagiri Yéésú taalibe yi

¹ Wona' Yéésú iñyaa níi wocce ra, dī béyídté afi sun won tih : « Baap, wahtaa lahte : teebee ndami so' mi Koohu, nda mi mín teeḅa' ndamu bal. ² Fu onte so' sañ-sañ sun fi bēewē bééḅ, nda mi mín on bēewē déṅéén fú sē' rē bééḅ pesa na dúméh rē. ³ Pesa na dúméh rē nék, toka' níil yúhí do fi Koope fi kah-kah fa yínē kut da, a yúhí so' mi Yéésú-Kiristaa fa wol fu ra. ⁴ Mi panke légéyē nah fu so' ra, mi teeḅa'te ndamu feey fa. ⁵ Baap, kon leegi on so' ndam hēbísú, ndama húmú laha' mi dōo na, na lahay ēldúnē doom ra.

⁶ « Bēewē beḅ fu ēldúnē fu déṅéenté sē' wē rē, mi teeḅpe wa daa fu wah. Daa fu laha' wa, fu déṅéenté sē' wē, wa ñeyute wonu. ⁷ Leegi, wa yúhúte bití iña on fu so' ra bééḅ kola' dōo na. ⁸ Mi wonte wa unna won fu so' ra, te wa tahute wa. Wa yúhúte bití mi kola' dōo na kah-kah, wa gémuté bití daa fu wol so'. ⁹ Af wa daa tah mi na daṅ do. Mi dagiray bēewē feey fi beh, mi dagid bēewē déṅéén fú sē' rē, ndah wa yuu. ¹⁰ Yii lah mi bééḅ daa fu laha', te yii lah fu bééḅ daa mi laha' ; te ndami so' feeñce waa na. ¹¹ Tasse yutuud mii homil ēldúnē ; mi yuloh dōo na, ndaa wa fi yeh, wa lísú ēldúnē. Baap,

do fa sela ra, níirée wë tii gaanu, bee on fu so' ra, nda di lígínúu yen ana yen henute yínë, wa hen yínë d̄aaha. ¹² Homa' mi a wa ra, mi húmú níirë' wë a tii gaanu, bee on fu so' ra. Mi níidté wë, te ow múuyëy waa na, henay b̄ëe' wadti múuy d̄ë, nda yee won Téerëe rë lah.

¹³ « Bi leegi mi yuloh doo na, mi won wa iñyah bee lís mí ëldúnë bee ra, nda sosi keeña laha' mi ra hom waa na, keeññi wa sos dotooy. ¹⁴ Mi léhínté wë yee won fu so' ra, b̄ëy ëldúnë anutee waa kaa', ndah wa nënín b̄ëy ëldúnë ti so' nen. ¹⁵ Mi d̄añ doo bití fu s̄ëmlë' wë ya' Seytaane, ndaa bití fu k̄élí d̄ wë ëldúnë neh. ¹⁶ Wa nënín ëldúnë ti so' nen. ¹⁷ Bukutee wa kaaf ka, wa hen yuu ; wonu daa kaaf ka. ¹⁸ Mi wolte wa ëldúnë ti di wola' fu so' ëldúnë nen. ¹⁹ Af wa tahte mi j̄ébëlté rë af so' mi hente buu, nda wa bukutoh kaaf ka raa, wa hen yuu bal.

²⁰ « Mi d̄agid̄ wa neh don, ndaa a b̄ëewë nay soo gémé filoon fe ndah iña nay wone wa fi yee sun fi so' ra. ²¹ Baap, mi d̄añ doo bití wa b̄éeb̄ hen yínë. Di homa' fu soo na mi hompe doo na, wa bal homuun yen na d̄aaha. Hen d̄aaha raa, b̄ëy ëldúnë ay gém bití daa fu wol so'. ²² Ndama on fu so' ra mi onte wa ri, nda wa hen yínë ti di henuu yen yínë nen, ²³ mi hom waa na, fu hom soo na, wa b̄éeb̄ bok hen yínë. Hen d̄aaha raa, b̄ëy ëldúnë ay gém bití daa fu wol so', te fu faha'te wa ti di faha' fu so' nen. ²⁴ Baap, tígë na saañ mi ra, mi faha'te bití b̄ëewë déjéén fú s̄ë' rë hom na bal, nda wa ot ndama on fu so' ra, ndah fu maañcee soo faha' balaa ëldúnë saku. ²⁵ Te Baap, do fa júb d̄ë, b̄ëy ëldúnë yíih rë, ndaa mi

yúh rë, te bëewée ke so' yee yúhúte biti daa fu wol so'. ²⁶ Mi teebpe wa nú wa yúhúte daa fu wah, te may waa rii baatti teeb, nda faha'a faha' fu so' ra hom waa na, te so' bal mi hom waa na. »

18

Hami Yéésú

(Saame Maccëe 26.47-56 ; Marka 14.43-50 ; Lúkkë 22.47-53)

¹ Wona' Yéésú iñyaa nú wocce ra, dí kolohte dah bani taalibe yi húusúte húlbí Sedoron, haalute meey daaha. ² Di fi Yudaas fa nay rii yaaye ra yúh hatni baaha, ndah Yéésú a taalibe yi na húmú nëfih daaha. ³ Di kúdté goomal soldaar a i wohoh di Faam fi gaani Koope yi yéngké biti kélfë yí seeyoh ya a farisenja daa yeru ri wa. Wa ayute, kúreelúuté i lampa, kocom hawaanaa a ganaay. ⁴ Bi yúh Yéésú iña nay rii kate ra béeb, dí lebohte wa won wa tih : « Don saamu wah ? » ⁵ Wa tahute wonu ri tih : « Fun saamu Yéésú fí bëy Nasaret. » Di won wa tih : « Daa mi ! » Yaaha béeb, deef Yudaas fa na saañ díi yaaye ra húmú filib fi wa. ⁶ Yéésú na won wa bitih « daa mi » rek, wa sajalute, lasuute feey. ⁷ Yéésú meelaatte wa won tih : « Don saamu wah ? » Wa wonu ri tih : « Fun saamu Yéésú fí bëy Nasaret. » ⁸ Di wonaat wa tih : « Mi wonte ron ri koon, daa mi ! Don saamun so' kut daa, yéddí bëewí yee saañ. » ⁹ Yee húmú won Yéésú rë laha'te dah. Di húmú won tih : « Baap, mi ñakay ow yinë sah di bëewë déjéen fú sè' rë. » ¹⁰ Deef Simon Peer kúdté jépíl. Di yíppée ríi fúul, paanke ri súrgíi seeyohi gaana,

lecce nufi ñamaa fa. Súrgëe nufa lecu ra hínú Malkus. ¹¹ Yéésú won Peer tígí daaha tih : « Nimilire jéplú mbari ! Gulii coono fa yed' so' Baaso' ra mi waray rii han waro a ? »

Kúrí Yéésú fii Haan

(Saame Maccëe 26.57-58 ; Marka 14.53-54 ; Lúkkë 22.54)

¹² Soldaarra a kélfii wë, a wohoh yi Faam fi gaani Koope habute Yéésú tígí daaha, pokalsuute ri a níh. ¹³ Wa débúu rii kúd faam Haan. Haan daa pacool Kayif fa húmú seeyohi gaana kíilí baaha ra. ¹⁴ Di fi Kayif daa húmú won yëwúdfë bití ow yínë kut ñak ñíiní ndah bëewë daa gén.

Taasa'i Peer yúhí Yéésú

(Saame Maccëe 26.69-70 ; Marka 14.66-68 ; Lúkkë 22.55-57)

¹⁵ Na kúru wë Yéésú faam seeyohi gaana ra, Simon Peer a ow kay di taalibe ya ñeyute tala. Bi yúh seeyohi gaana taalibii bah, tahte dí fi taalibee a Yéésú daa hëeltú filií faam fa. ¹⁶ Ndaa Peer húmú ëssín, hëbís ilë. Tígí daaha, taalibee koon dúhté, wonte a belaa na woh ilë rë, bekke Peer filií. ¹⁷ Belaa won Peer tih : « Do fi bee bal, fu noneh taalibe yi bëyí bee nagajek a ? » Peer won dí tih : « Mí noneh na dé' ! »

¹⁸ Bi húmú sos Koo, súrgë yë a wohoh ya këdfúté kíi na yoonnduu ; Peer hompe a wa na yoonndoh bal.

Yéésú fii Haan

(Saame Maccëe 26.59-66 ; Marka 14.55-64 ; Lúkkë 22.66-71)

19 Seeyohi gaana* yampe na meel Yéésú yii lenjke taalibe yi na a yee na yéeddè' rí rë. 20 Yéésú won dī tih : « Iña won mi ra, mi wona' wa sun bëewë béeb na keluu. So' mi mëssí yéeddè' filiḅ ílíyyë na daguu yëwúddë Koope ra a filiḅ Faam fi gaani Koope, te yëwúddë béeb tee'uu na ; mi wonay yin las ! 21 Ngana meel so' ! Iña won mi ra, meelee wa bëewë síkírúu sē' rë. Wa yúhú iña won mi ra. » 22 Wona' Yéésú woni bah, lahte wohohi húmú nē, fúudté rí mbey, won tih : « Fay lofee seeyohi gaana daaha a ? » 23 Yéésú won dī tih : « Woni so' ñeyay waal raa, teeḅ so' tígë héllë' mí rë, ndaa hena biti mi wona kaah raa, deef fu laba' so' yih ? » 24 Tígí daaha, Haan yeñce Yéésú faam Kayif seeyohi gaana, deef Yéésú lís pokki.

Peer taasilte yúhí Yéésú

(Saame Maccëe 26.71-75 ; Marka 14.69-72 ; Lúkkë 22.58-62)

25 Filiḅ fi yaaha béeb, Simon Peer hompe na yoonndoh rek. Lahte bëyí won dī tih : « Do fi bee bal, fu noneh taalibe yi nagajek a ? » Peer taasa'te won dī tih : « Mi noneh na dé' ! » 26 Filoon fi baaha, ow di súrgë yí seeyohi gaana, mboko mi bëe' Peer lec nufa ra, won dī tih : « Mí ot do fi bee a dī filiḅ meeya neh nagajek a ? » 27 Taasa' Peer waali yínée, paan yíppée fiisoh.

* **18:19** 18.19 Seeyohi gaana na wonuu dee ra, dī Haan. Bín fë nagajek deef Kayif daa húmú seeyohi gaana, ndaa bi Haan mëssée hen seeyoh gaan te daa ri pacool Kayif, bëewë húmú dëekúu rí seeyoh gaan.

Kúrí Yéésú fii Pilaat

(Saame Maccëe 27.1-2, 11-31 ; Marka 15.1-20 ; Lúkkë 23.1-5, 13-25)

²⁸ Yéésú beyute faam Kayif daaha, kúrúte faam gëernëer ßaabin cúß. Ndaa lahuu wa ra, wa haaluy filiß, wa kaa'uu biti wa ay sobeye nda wa mín ñam ñami feedi Paaga. ²⁹ Tígí daaha, Pilaat deefidte wa won wa tih : « Don wonu ti bëyí bee paŋ yih ? » ³⁰ Wa lofute ri wonu tih : « Di henay ow ßos koon fun këmí rë rí ! » ³¹ Pilaat won wa tih : « Don fi yaa bëyí rí, ðon ñee yee won kootii ron ra ðon aattiya' ri ! » Wa wonu ri tih : « Fun lahuy sañ-sañi tikúun fun húl sun ow, fun hap ri. » ³² Yee húmú won Yéésú rë laha'te ðah sun fi dee nay rii húlée rë.

³³ Tígí daaha, Pilaat nimilte filiß faam fa, dëekrëhté Yéésú meelte ri won tih : « Daa fu buuri yëwúddé è ? » ³⁴ Yéésú won ði tih : « Woni baa kola' ðoo na mbée ow daa won ðo baaha sun fi so' ? » ³⁵ Pilaat tahte won tih : « Maa mi yëwúddé è ? Bëy heedon a kélfé yí seeyoh yon daa komu so' ro ! Kon fu paŋ yih ? » ³⁶ Yéésú loffe ri won tih : « Nguur ki so' nguur ki feey fi bee neh. Nguur ki so' yaha nguur ki feey fi bee koon, tin súrgë yí sè' ay soo haa'id' ní mi yëeyih yëwúddé ; èe-èe', nguur ki so' nguur ki feey fi bee neh. » ³⁷ Pilaat won ði tih : « Kon fu buur a ? » Yéésú won ði tih : « Fu wonte ri, daa mi ! Seedii kaaf ka daa tah mi límú, seedii kaaf ka daa tah mi ac feey fi beh. Te bëyí hom kaaf ka bééß, helte nuf iña na won mi ra. » ³⁸ Pilaat won ði tih : « Úh ! Yi daa kaah ? »

Kola' ri woni bah, Pilaat ðúhëetté ëssín deefidte yëwúddé, won wa tih : « So' mi olay

yii mín tíkú sun fi bëyí beh, ³⁹ te don baahuu biti lahaa Paak béeb, mi dúhríd don ow yínë kasu. Don fahuuy biti mi yessid don buuri yëwúddë ë ? » ⁴⁰ Tígí daaha, wa béyruté unni wa sun wonu tih : « Èë-ëë' ! Di neh ! Dúhríd fun Barabaas. » Deef dī fi Barabaas fa banndi.

19

¹ Filoon fi baaha, Pilaat naha'te fúuddëhí Yéésú laraw. ² Soldaarra beyute ñap yugusute baane, bekute ri af Yéésú, tíkuté paltu luum sun fi, ³ lebuute ri wonu ri tih : « Coleere buuri yëwúddë ! » Wa na anuu rii fúudsë' mbey.

⁴ Pilaat dúhëetté yëwúddë në, won wa tih : « Cëe mi ac mi komdoh ron ri ëssë, nda don yúh biti mi olay yii mín tíkú sun fi bëyí beh. » ⁵ Tígí daaha, Yéésú dúhté, bani baanii yëlbí a paltii luumi. Pilaat won bëewë tih : « 'Bëe' abah ! »

⁶ Kélfë yí seeyoh ya a wohoh ya oluu wa Yéésú, wa béyruté unni wa sun na wonu tih : « Daaye ri kurwah bal ! Daaye ri kurwah ! » Pilaat won wa tih : « 'Béyí rí don daayid' dī affon. So' mi olay yii mín tíkú sun fi. » ⁷ Yëwúddë wonu Pilaat tih : « Kootii fun kadda'te ow sol Koope, te ri wonte biti dī Koy Koope. Kon dī wadti hawun húl ! »

⁸ Kela' Pilaat woni bah, dī baattee tíit. ⁹ Di haalaatte faam, meelte Yéésú won dī tih : « Fu dúhë' dih ? » Yéésú hente tid, lofay ri. ¹⁰ Tígí daaha, Pilaat won dī tih : « Fii soo tiil a ? Fu yéeh biti mi mín dëe yeris te mi mín dëe daaydoh kurwah a ? » ¹¹ Yéésú won dī tih : « Fu mínéh yin yínë sah sun fi so', henay yee yed do Koope

fa sun dfa. Yii baa daa tah bakaadi bēe' yeñ so' dfo na ra luk buu gaan. »

¹² Pilaat kola' daaha na saam dee nay rii yeddee Yéésú rē. Ndaa yēwúdfē béyruté unni wa wonu tih : « Fu yeris bēyí bee deef fu ñéerēey a Sesaar*. Bēyí tík afi buur, deef haa' Sesaar. » ¹³ Kela' Pilaat unni yah, dī d'úhídte Yéésú fēel, antee took ñaana na aattiyuu, hom èssē dérúu a la', na wonuu yēwúdfē Gabataa ra. ¹⁴ Yiin fi baaha, tee'a' a bisa mǐllē' waaji Paagi yēwúdfē, bee laha' na' leelu af ra. Pilaat won wa tígí daaha tih : « Buuron abah ! » ¹⁵ Ndaa wa béyruté unni wa na wonu tih : « Di húlē bal ! Di húlē ! Daaye ri kurwah ! » Pilaat won wa tih : « May daaye buuron kurwah nam a ? » Kélfē yí seeyoh ya wonu ri tih : « Henay Sesaar, fun lahuy buur kay. »

¹⁶ Tígí daaha, Pilaat yedfa'te wa Yéésú, wa daaye ri kurwah.

Daaji Yéésú kurwah

(Saame Maccē 27.32-44 ; Marka 15.21-32 ; Lúkkē 23.26-43)

Soldaarra yípútée ham Yéésú. ¹⁷ Di fi Yéésú daa enoh kurwahi, wa d'úhúte gina, yullute tígē nē wonuu « Kēeŋ-af » ra. Tígí daaha wonuu « Golgotaa » di ébrē. ¹⁸ Lahuu wa ra, soldaarra daayute Yéésú kurwaha. Wa daayaaluute ow ana kay kurwah : bēyí yínēe paa'te Yéésú ya' ñamaa, yínēe paa'te ri ya' sugu, Yéésú hompe leelaa.

* **19:12** 19.12 Sesaar :Bín fē, bēyí hómú hen buur di Rom bēeb dēekúu dfaaha.

19 Pilaat naha'te bíní a tíkréhí unni yee sun fi kurwaha. Unna won yii beh : « Yéésú fí bëy Nasaret, buuri yëwúddë. » 20 Bi wulay tígë daayuu Yéésú rë gina, te unna bíníyú ébrë, lateñ a gerek, ow caak olute, yúhúte yee bíníyú rë. 21 Yee bíníyú baa ra nebaay kélfë yí seeyoh ya, wa payute wonu Pilaat tih : « Fu waray bíní “buuri yëwúddë” koon. Fu wadti bíníyë bití “bëyí bee won ti daa ri buuri yëwúddë”. » 22 Pilaat won wa tih : « Yee bíní mí rë, mi bíníté rí níi wocce. »

23 Daayuu soldarra Yéésú níi wocce ra, wa beyute yéré yí woruute wa cér iniil hanndal ki wa. Wa anutee beë búubée ké rí teru sun níi feey te lahay dñis dë, 24 wonu tih : « Génë bití yen ðarun ri ðaro raa, yen púlúf rí yen ot bëe' nay rii lahee ra. » Yee húmú bíníyú Téerëe rë laha'te ðah. Téerëe húmú won tih : « *Wa woruute yéré yí së', púlúfúté búubí së'.* »* Dee bíníyúu rí ðaa ra, soldarra paguu ri ðaaha kep. 25 Yaafi Yéésú húmú cañ hëbís kurwaha ðani koy-yaafa beleb, a Mari beleb Kolopas, a Mari fi bëy Makdalaa. 26 Yéésú otte yaafi, otte taalibee daa kooji ra hompe hëbísí, ðí won tih : « Yaa ow, koohu abah. » 27 Di won taalibee tih : « Yaafu abah. » Kola'te baaha, taalibee beëpe yaafi Yéésú yeffe ri faami.

Húlí Yéésú
(Saame Maccë 27.45-56 ; Marka 15.33-41 ;
Lúkkë 23.44-49)

28 Nda yee won Téerëe rë lah, filoon fi baaha, bi yúh Yéésú bití iña béëb púlgísë'té leegi, ðí

* 19:24 19.24 Saame Kañaa ya 22.19

won tih : « Mi sifirohte. » ²⁹ Deef lahte yaadi lííffé bineegar húmú hatinni yaaha. Soldarra yípútée beɓ líil soopute ri bineegar, pokute ri ya' isop, yullute ri búk Yéesú na fahuu hēndí. ³⁰ Díkísē' Yéesú bineegara, dī won tih : « Iña béeb púlgísē'té. » Di sígimpé, yedfohte lússé.

Yéesú tawute juun araal

³¹ Wahtu yi yaaha, deef bisa na hílsúu yēwúddē rē ee saañ dale ra. Kélfē yí yēwúddē fahuuy bití búudé hom sun kurwah bis hílsēe, baatte bití bisi hílsíi bee bis gaan. Tígí daaha, wa payute Pilaat na, wonute ri bití dī naha' korsa'i kotti bēewē daayu ra†, búudé yē kēllú tígē. ³² Nahuu soldarra baaha ra, wa ñeyute bēewē daayu a Yéesú rē, korsuute kotti bee déb dē, ñeyute ana fa na, korsuute kotta. ³³ Di fi Yéesú nék, lahuu soldarra dīi na olute bití dī húlté níi wocce ra, tígí daaha, wa korsuuy kotta. ³⁴ Ndaa ow di soldarra tappe ri juun hatin araal, ñif a muluɓ yíppée nēe dūh.

³⁵ Bēe' bílíd iñyee ra tíkké íllí nē ngēey, te iña won dī ra laha' dāaha. Di a faanañ fi yúhté bití iña laha' dāaha. Don ot dī won iñyeh, nda don gém don bal. ³⁶ Iñyaa béeb laha'te dah, nda yee bíníyú Téerēe rē lah. Bíníyúté Téerēe bitih : « *Yuh yínē sah ii kon faana.* »[☆] ³⁷ Bíníyúté bití bal : « *Wa ay yíid bēe' wa jabu ri ra.* »[☆]

† **19:31** 19.31 Bín fē, bēewē húmú daay ow kurwah wa faha' bití bēe' yíppí húl rēe, wa húmú korsuu kotti bēe' korsoo. ☆ **19:36** 19.36 Saame Kolohi koyyi Israyel Ésíp 12.46 ; Kíní bēy Israyel 9.12 ; Kañaa ya 34.21 ☆ **19:37** 19.37 Saame Sakari 12.10

Haji Yéésú

(Saame Maccëe 27.57-61 ; Marka 15.42-47 ; Lúkkë 23.50-56)

³⁸ Filoon fi baaha, lahte bëyí hínú Suseef dék Arimate, payte Pilaat na, meelte ri búudé fí Yéésú. Di non taalibe yi Yéésú ndaa bi húmú neeh ri kélfë yí yëwúdfë, di húmú teekiraay baaha. Pilaat tahidte ri, Suseef payte bëbpe búudé fë. ³⁹ Tígí daaha, Nikodem bal acce habra'te ri. (Nikodem fi baa húmú mëssee pay yérí Yéésú elek.) Wa kúrúte laakkoloñi yugusuu míirí boolluu a barbosaa, yi wadtee mit kíle sabay éeyë. ⁴⁰ Wa beyute búudé fí Yéésú, na líiwú rí boy, na túmú rí yin heeñlaa ti di baahuu ri yëwúdfë nen biti wa yahti hac búudé. ⁴¹ Tígë daayuu Yéésú kurwah ra lahte meey, bi kolom ki ow mësúy nëe hacu húmú në. ⁴² Bi na saañ dale bisa na hílsúu yëwúdfë rë te kolom ka wulay daaha, wa dɔpate búudé fí Yéésú në.

20*Kolohi Yéésú búudé*

(Saame Maccëe 28.1-8 ; Marka 16.1-8 ; Lúkkë 24.1-12)

¹ Hagadi dímeesë, Mari fi bëy Makdala kolohte saañce tígë haccuu Yéésú rë. Laha' ri ra, dī deef la'a húmú búk luuya ra éccírúte. ² Di yíppée múkë Simon Peer na a taalibii yínëe Yéésú kooya' ri ra, won wa tih : « Búudé fí Yíkëe beyute nuña, te fun yíih tígë kúrú rí rë. »

³ Tígí daaha, Peer a taalibii yínëe koluute na suu luuyin. ⁴ Wa húmú múkëyú múkëyë na suu wa ra. Bi luk taalibii yínëe Peer gaaw, dī débpe

rí luuya. ⁵ Laha' ri ra, dī yérəntəhté otte boyya filiḅ, ndaa ri haalay. ⁶ Simonj Peer laha' daaha, haalte na yeel boyya. ⁷ Boya húmú af Yéésú rē homay a boyyi kayya ; dī túlúñú túlúñě, hompe kay. ⁸ Taalibii yíněe d'ébpí lah ra haala' daaha otte boyya, gémpé bití Yéésú kolohte. ⁹ Yúhí bití níi a baaha, d'eeḫ taalibe ya yíih yee faha' won Téerée rē doom, bití Yéésú wadtee koloh búudé. ¹⁰ Taalibe yi ana ya koluu daaha, suute faam.

Feeñiyohi Yéésú Mari fi bēy Makdala
(Saame Maccēe 28.9-10 ; Marka 16.9-11)

¹¹ Di fi Mari, nimila' ri ra, hom fēel fí luuya na looy. Di hom looya yérəntəhté filiḅ, ¹² otte malaaka ana yi bekuu búuḅ naa', tookute tígě húmú fēndú búudé fí Yéésú rē, bee hompe hatna húmú afa ra, yíněe hompe hatna húmú paa' kotta ra. ¹³ Wa wonu ri tih : « Fu looy yi yaa ow ? » Di won wa tih : « Búudé fí Yíkíi sē' beyute, te mi yéeh tígě kúru rí rē. »

¹⁴ Di hom woni yii baa na heeltōh, dī otte ow caṅke hēbísí ndaa ri yéeh bēe', deef yaa Yéésú. ¹⁵ Yéésú won dī tih : « Fu looy yi yaa ow ? Fu saam wah ? » Bi haba' Mari bití yaa wohohi meeya, dī won bēe' tih : « Bahaa, daa fu kúrē rí rēe, won so' tígě d'ap fu ri ra, mi kale ri. » ¹⁶ Yéésú won dī tígí daaha tih : « Mari ! » Di yíssəhté Yéésú nē, won tih : « Rabbuni ! » (daa ri yēeddēh di ébrē). ¹⁷ Yéésú won dī tih : « Ngana ham so' deh, ndah mi lahay Baaso' na doom. Tílé fu won koy-yaayyi so' bití mi hom kotti saañi Baaso' na daa Boffon d'a, Koope fi so' na daa Koope fon d'a. » ¹⁸ Mari fi bēy Makdala

yíppée saañ, wonte taalibe ya bití dī otte Yíkée, léhínté wē yee won dī ra.

Feeñiyohi Yéésú taalibe yi

(Saame Maccëe 28.16-20 ; Marka 16.14-18 ; Lúkkë 24.36-49)

¹⁹ Sosad' na'i díméesí baaha, bi d'eef taalibe ya kaañuy kélfë yí yëwúddë, wa téyúuté faam. Yéésú acce hente bereeh leelii wa, won wa tih : « Cëlíirí yaawe ! Hëmíi jaamma ! » ²⁰ Wona' ri wa iñyaa ra, dī teeβpe wa ya' yi a hatni yínii araali. Keeññi taalibe ya sos soso níi ola olu wa Yíkée rë. ²¹ Yéésú wonaat wa tih : « Cëlíirí yaawe ! Hëmíi jaamma ! Di wola' so' Baaso', so' mi wola' ron daaha. » ²² Kola' ri woni baa ra, dī ëffé sun fi wa, won wa tih : « Tëhí Ruuh-Peseñ ! » ²³ Bëyí don baal ri bakaadfi, d'eef Koope baalte ri. Bëyí don habid' dī bakaadfi, d'eef Koope habidte ri wa. »

Feeñiyohi Yéésú Toomaa

²⁴ Toomaa fa na dëekúu Síisë rë non taalibe yi sabboo a ana ya, d'eefaay na ac Yéésú rë. ²⁵ Aya' ri taalibe yi kayya wonute ri bití wa olute Yíkée rë, dī won wa tih : « Hém so' mi olay daayiitti pontu ya ya' ya, hém so' mi bekay kun so' ílíyyë daayuu ri faana ra, te mi bekay ya' so' lafi araali, mii mëssí gém bití dī kolohte búudé. »

²⁶ Nimila' bisi baa d'eef taalibe yi Yéésú téyëetuté faam fa, Toomaa hompe a wa ra, Yéésú acce hente bereeh waa na won tih : « Cëlíirí yaawe ! Hëmíi jaamma ! » ²⁷ Di antee won Toomaa tih : « Beke kunu nuññi ya' yi so' fu olsoh ; beke ya'u araal so'. Yedde lah nuf ana,

fu gém ! » ²⁸ Toomaa won dī tih : « Daa fu Yíkíi sè', daa fu Koope fi so' ! » ²⁹ Yéésú won dī tih : « Biti fu otte so' daa tah fu gém è ? Bèyí gém sè' te olay so', lahte sos-keeñ. »

Yee tah téeríi bee koloh ra

³⁰ Yéésú paŋke kimtaan kay caak fíi taalibe yi, yi yéŋké bití bíllúy téeríi beh. ³¹ Yee filíib téeríi bee nék, bíllú bití dón gém bití Yéésú daa Buura Koo fal ri ra, Koy Koope. Te dón gém díi na raa, dón ay pes ndah dī.

21

Kimtaani mbaala líif jén dē

¹ Filoon fi baaha, Yéésú feeñiyaatte taalibe yi búk laahi Tiberiyat*. Di feeñiya' wa deh : ² Simoŋ Peer a Toomaa fa na dēekúu Síisè rē daa húmú, a Natanayel fi bëy Kanaa di Galile, a koyyi Sebede, a taalibe yi Yéésú ana kay. ³ Simoŋ Peer won wa tih : « Mee saañ seeb dā. » Wa wonu ri tih : « Caa fun ñéerè' a ro fun bal. » Tígí daaha, wa ñéerúuté haalute gaala. Ndaa elgi baaha béeb wa habuy yin.

⁴ Yíilè' Koo ra, Yéésú acce caŋke búk laaha, ndaa taalibe ya yíihsíih rí. ⁵ Di won taalibe ya tih : « Don habute jén saa yaawe ? » Wa wonu ri tih : « Fun habuy yin. » ⁶ Di won wa tih : « Yéésí mbaala hatna paa' ya' ñamaa di gaala ra, dón ay ham. » Tígí daaha, wa yeesute mbaala. Mbaala hampe jén, líif líifè níi wa míníh ríi dúhíd mulaa. ⁷ Ow di taalibe ya, kooji Yéésú, won Peer tih :

* **21:1** 21.1 laahi Tiberiyat :non tii ya na dēekúu laahi Galile ra.

« Yaa Yíkëe ! » Kela' Simonj Peer uni bah, dī yíppée bekoh búubée ké rí húmú nís dī na seeb dī ra, yíppée haal mulaa. ⁸ Taalibe yi kayya ayuu a gaala, na fasu mbaala líif jén dē. Wa húmú wuluuy búk laaha, yee talluu wa ra wadti hena jaak tíméer (100).

⁹ Lahuu wa cépúté gaala ra, wa olute jén tíkuté sun kíi, mbúurú hompe hatni beh. ¹⁰ Tígí daaha, Yéésú won wa tih : « Jéné dúhúu ron ham da, kúrí i koy na deh. » ¹¹ Simonj Peer haalaatte gaala, fasse mbaala líif jén dē, dúhídté rí èssè. Jéné béeb hente koy tíméer a koy sabay iip a koy éeyè (153), te dee teem wa ra béeb tahay mbaala dad. ¹² Filoon fi baaha, Yéésú won wa tih : « Èyí don ñam ! » Ow yínè sah di taalibe ya kaañay rii meel daa ri wah, ndaa wa yúhúté biti yaa Yíkëe. ¹³ Yéésú lebohte, bebpe mbúurée wora'te wa, dī bebpe jéné bal hente dāaha. ¹⁴ Baa daa waali éeyè fè feeñiyoh Yéésú taalibe yi, kèllúu rí búudé rè.

Yéésú a Peer

¹⁵ Ñamuu wa níi wocute ra, Yéésú meelte Simonj Peer won dī tih : « Simonj fi Sanj, di faha' fu so' luk di fahuu so' bëewí yee a ? » Peer won dī tih : « Yíkëe, fu yúhté biti mi faha'te ro. » Yéésú won dī tih : « Lah tooppitee harri so'. » ¹⁶ Yéésú meelaatte ri won tih : « Simonj fi Sanj, fu faha'te so' a ? » Peer won dī tih : « Yíkëe, fu yúhté biti mi faha'te ro kay ! » Yéésú won dī tih : « Lah níiré harri so'. » ¹⁷ Di wonil ri waali éeyè fè tih : « Simonj fi Sanj, fu faha'te so' a ? » Yee meela' ri Yéésú waali éeyè fè biti nda ri

faha'te ri ra, d'úmèlté keeña. Di loffe Yéésú won tih : « Yíkëe, fu yúh béeb ! Kon fu yúhté biti mi faha'te ro ! » Yéésú wonil ri tih : « Lah tooppitee harri so'. ¹⁸ Mee roo won kaaf ka ra ee : hena' fu kúkëy rë, daa fu na hómú pokit afu geñuu, fu pay tígí neba' ro ; ndaa tíl níi fu baha raa, fay béyíd ya' yu, ow kay pokid d'ó geñuu, kúd d'ë tígí fu fahaay naa pay. » ¹⁹ (Unna won Yéésú yaa ra, d'i hom teebe'i dee nay húlée Peer ra. Peer ay teebee ndami Koope daaha.) Yéésú antee tík won d'i tih : « Ñeye tal so'. »

Yéésú a taalibee d'i kooya' ri ra

²⁰ Filoon fi baaha, Peer heeltohte, otte taalibee Yéésú kooya' ri ra na ac filoon wa. Daa ri taalibee hómú s'ígím nuf Yéésú homuu wa ñama, meelte d'i fi Yíkëe b'ëe' nay rii yaaye ra.

²¹ Ola' Peer taalibee ra, d'i meelte d'i fi Yéésú won d'i tih : « A d'i fi bee nék Yíkëe ? » ²² Yéésú won d'i tih : « Mi faha' biti d'i pes níi mi nimil raa, waal fu yaha yi na ? Fu laha' biti fu ñee tal so'. »

²³ Yaa bah, wona líiwëlsë'té filib fi b'ëewë gémú Yéésú n'ë rë biti taalibii baa ii ñee húl. Añcañ, Yéésú wonay biti ri ii húl, d'i won wono ndék tee : « Mi faha' biti d'i pes níi mi nimil raa, waal fu yaha yi na ? »

²⁴ Di fi taalibee sah-sah daa b'ílíd iñyaa bínité wë, te fun yúhúté biti iña won d'i ra kaah.

²⁵ Yéésú pañke i yin kay caak yi fu yéñké biti ñeyun yínë-yínë bíníyú koon, mi lahte yaakaari biti tééré yë ii dam feey fi beh.

Séréel Ndút: Unni Koope

Ndut: Séréel Ndút: Unni Koope (New Testament+)

copyright © 2020 Wycliffe Bible Translators, Inc.

Language: (Ndut)

Contributor: Wycliffe Bible Translators, Inc.

All rights reserved.

2020-11-20

PDF generated using Haiola and XeLaTeX on 21 Feb 2024 from source files dated 29 Jan 2022

a3a1238b-9393-5875-a4c5-1d3f38537bfe